

NÜXĨRAÛXŨ GA POPERA GA CORÍTIUCŨAX GA YAXŌGÜXŨTANÜWA NAMUXŨ GA PAURU

Pauru rü nüxŭ narŭmoxē ga yema
yaxōgŭxŭ ga Corítuarü iānewa
yexmagŭxŭ

1 ¹⁻²Pa Chaueneēgü i Corítuicŭāxgŭx,
choma i Pauru rü namaā i taeneē i
Chótene nixĩ i pexçax tanaxŭmatixŭ i
ñaā popera. Rü Tupana nixĩ ga choxŭ
yaxucü na Ngechuchu ya Cristu choxŭ
imuxŭ na duŭxŭgŭmaā nüxŭ
chixuxŭçax i norü ore. Pa Chaueneēgü
ya Tupanaärü Ixīgŭxe, pema rü marü
Tupanapexewa pixüüne yerü
Ngechuchu ya Cristu marü pexŭ
nixüünexēē. Rü Tupana rü marü pexŭ
nade na norü duŭxŭgŭ pixīgŭxŭçax
wŭxigu namaā i guxŭma i ngēma
duŭxŭgŭ i guxŭwama tórü Cori ya
Ngechuchu ya Cristuxŭ icuaxŭgŭxŭ.
Rü nüma ya Ngechuchu ya tórü Cori
ixĩcŭ, rü ngēma duŭxŭgŭarü Cori ta
nixĩ. ³Rü chanaxwaxe ya Tanatü ya
Tupana rü tórü Cori ya Ngechuchu ya
Cristu poraäcŭ pexŭ narŭngŭxēē rü
pexŭ nataāxēē.

Tupana tüxŭ narŭngŭxēē erü Cristuarü
duŭxŭgŭ tixīgŭ

⁴⁻⁵Rü guxŭguma pexçax Tupanana
moxē chaxā, yerü Ngechuchu ya
Cristugagu Tupana poraäcŭ pexŭ
narŭngŭxēē, rü pexna nanamu ga Naāē i
Üünexŭ na guxŭgutáma pemaā
inaxāxŭçax. Rü yima Cristugagu pexŭ
nanatauxchaxēē na nüxŭ pixuxŭçax i
norü ore, rü pexna nanaxā i cuax na
meā ngēma orexŭ pecuáxŭçax. ⁶Rü
yemaäcŭ ga yexguma nüxŭ pexĩnüēgu
ga yema ore ga Cristuchiga rü aixcŭma
peyaxōgŭ. ⁷Rü ngēmacax i ñuxma na
ípenangŭxēēxŭ na wena táxarü núma
naxŭxŭ ya tórü Cori ya Ngechuchu ya
Cristu, rü Tupana pexna nanaxā i taxŭ i
cuax na taxuŭma pexŭ taxuxŭçax na
naxçax pemaxēxŭ. ⁸Rü ngēmaäcŭ tá
pexna nadau ya Tupana ñuxmatáta
nagŭ i naāne, rü guxŭgutáma pexŭ
naporaexēē na aixcŭma
peyaxōgŭamaxŭçax rü naxçax
pemaxēxŭçax, na taxúema chixexŭmaā

peḡũ ixugũḡcax i ngẽxguma wenaxãrũ
núma naxũxgu ya tórũ Cori ya
Ngechuchu ya Cristu. ⁹Rũ Tupana rũ
guxũguma nayanguxẽẽ i norũ uneta. Rũ
núma nixĩ ga peḡũ yadexechixũ na
aixcũma Nane ya tórũ Cori ya
Ngechuchu ya Cristumücũgũ
pixĩgũḡcax.

Nũgũ nitoye ga yaxõgũxũ

¹⁰Pa Chaueneẽgũx, tórũ Cori ya
Ngechuchu ya Cristuégagu peḡũ
chacaḡxũ na wũxigu pegũmaã
perũxĩnũẽxũ rũ tama pegũ pitoyexũcax.
Rũ name nixĩ i aixcũma pegũ
pengechaũgũ rũ aixcũma wũxigutama
perũxĩnũẽ i peãẽwa. ¹¹Pa Chaueneẽgũx,
pemaã nũxũ chixu i ngẽma ore, yerũ
Croétanũxũtanũwa nũxũ chachuáchiga
ga pegũmaã na penuẽxũ, rũ tama
aixcũma wũxigu na perũxĩnũẽxũ. ¹²Rũ
pemaã nũxũ chixu i ngẽma erũ ñuxre i
pema rũ:

“Choma rũ Pauruwe charũxũ”,
ñaperũgũgũ. Rũ togue rũ:

“Choma rũ Aporuwe charũxũ”,
ñaperũgũgũ. Rũ togue rũ:

“Choma rũ Pedruwe charũxũ”,
ñaperũgũgũ. Rũ togue rũ:

“Choma rũ Cristuwe charũxũ”,
ñaperũgũgũ. ¹³¿Rũ ñuxãcũ nixĩ i
ngẽma? ¿Pexcax rũ Cristu rũ marĩ
niyauxye? ¿Exna pema nũxũ pecuḡxgu
rũ choma i Pauru chiũxũ ga curuchawa
pexcax chipotaxũ rũ chayuxũ? ¿Rũ exna
pema nũxũ pecuḡxgu rũ chauégagu
yĩxũ ga ípebaiũxũ? ¹⁴Rũ Tupanana
moxẽ chaxã, yerũ taxúema peḡũ
íchabaiũxẽẽ ga pemax. Rũ Crispu rũ
Gayuxicatama nixĩ ga íchabaiũxẽẽxũ.

¹⁵Rũ ngẽmacax taxucũrũwa texé tũgũ
tixu na chauégagu ítabaioxũ. ¹⁶Rũ
yemáacũ aixcũma íchanabaiũxẽẽ ga
Estéfanatanũxũgũ ta, natũrũ chauxcax
rũ taxúema ga togue tũxũ íchabaiũxẽẽ.
¹⁷Yerũ núma ga Cristu rũ tama choxũ
namu ga duũxũgũxũ na
íchabaiũxẽẽxũcax, natũrũ choxũ namu
na duũxũgũmaã nũxũ chixuxũcax i norũ
ore i mexũ i tũxũ maxẽẽẽxũ. Rũ
nanaxwaxe i tauxchaxũ i oremaã nũxũ
chixu i ngẽma ore. Erũ ngẽxguma chi
ñoma nũxũ cuḡxũchixũrũ nũxũ
chixuxgu i ngẽma ore, rũ ngũrũachi i
duũxũgũ rũ tá chauguama narũxĩnũẽ rũ
tá nũxũ inayarũngũmaẽ na Cristu yĩxũ
ga tũxũ maxẽẽẽcũ ga yexguma
curuchagu nayuxgux.

Cristuwa nixĩ ga Tupana inawéxũ ga norũ pora rũ norũ cuḡx

¹⁸Rũ ngẽma ore na ñuxãcũ tórũ
pecaduḡcax curuchagu nayuxũ ga Cristu,
rũ wũxi i natũcaxmamare nixĩ naxcax i
ngẽma duũxũgũ i poxcuwa íxũ. Natũrũ
yixema na Tupana tũxũ maxẽẽẽxũ, rũ
nũxũ tacuḡx na ngẽma ore rũ
Tupanaãrũ pora yĩxũ. ¹⁹Erũ norũ ore i
ũmatũxũwa rũ ñanagũrũ ga Tupana:

“Rũ tá ichayanaxoxẽẽ i guxũma i
norũ cuḡx i ngẽma duũxũgũ i
nũxũ cuḡxũchixũ. Rũ tá nũxũ
chaxo i ngẽma duũxũgũarũ
cuḡx”,

ñanagũrũ. ²⁰Rũ ñuxmax, Pa
Chaueneẽgũx, ¿Tupanapexewa rũ
ḡaciwa namexũ i ngẽma duũxũgũ i
poraãcũ nũxũ cuḡxũchixũ? ¿Rũ ḡaciwa
namexũ i ngẽma duũxũgũ i Moíché
ũmatũxũ i mugũwa nguxẽẽtaegũxũ?

¿Rü tacüwa namexũ i ngẽma duũxũgũ i meã nüxũ cuaxgũxũ i ñoma i naãneãrũ cuáchigagu na yadexagũxũ? Erũ guxũma i ngẽma cuax i duũxũgũ nagu rüxinũẽxũ rü Tupanacax rü taxuwama name. ²¹Natürũ nüma ya Tupana ya guxũxũma cuácũ, rü tama nanaxwaxe na ñoma i naãnecũāx i duũxũgüarũ cuágagu na yĩxũ i naxütawa nangugũxũ i nümagũ. Natürũ nanaxwaxe na ngẽma norũ ore i mexũgagu na yĩxũ i namaxẽxẽãxũ i ngẽma duũxũgũ i yaxõgũxũ woo togũcax rü natũcaxmamare yixĩgu i ngẽma ore. ²²Ngẽma Yudfugũ rü nüxũ nadaugũchaũ i cuaxruũgũ i Tupanaãrũ poramaã üxũ na ngẽmawa nüxũ nacuaxgũxũcax na aixcũma yĩxũ i ngẽma ore i nüxũ ixugũxũ. Rũ ngẽma Griégugũ rü naxcax nadaugũ i ñoma i naãneãrũ cuax na meã nüxũ nacuaxgũxũcax. ²³Natürũ ngẽma ore i toma nüxũ tixuxũ, rü Cristu ga curuchawa ipotacũchiga nixĩ. Rũ ngẽma ore rü naãẽwa nangux i Yudfugũ. Rũ ngẽma duũxũgũ i tama Yudfugũ ixĩgũxũcax rü wüxi i natũcaxmamare nixĩ. ²⁴Natürũ ngẽma duũxũgũ i Tupana idexechixũ i Yudfugũ rü ẽxna tama Yudfugũ ixĩgũxũ rü ngẽma duũxũgũcax rü Cristuwa nixĩ ga Tupana inawẽxũ ga norũ pora rü norũ cuax. ²⁵Rũ yema Tupana üxũ ga yexguma nayuxgu ga Cristu rü muxũma i duũxũgũcax rü wüxi i ngẽãẽmare nixĩ. Natürũ ngẽma Tupana nagu rüxinũxũ rü guxũma i ñoma i naãnecũāx i duũxũgüarũ cuaxarũ yexera nixĩ. Rũ yexguma curuchagu nayuxgu ga Cristu rü muxũma ga duũxũgũcax rü natura ga Tupana ga yexguma. Natürũ yexguma nixĩ ga inawẽãxũ ga ñuxãcü

guxũ i duũxũgüarũ yexera na naporaxũchixũ. ²⁶Pa Chaueneẽgũx, name nixĩ i nagu perũxinũẽ na ñuxãcü Tupana pexũ idexechixũ na norũ duũxũgũ pixĩgũxũcax. Rũ noxretama pixĩgu na nüxũ pecuaxũchixũ ega duũxũgũ pexũ ngugũgu, rü noxretama pixĩgu na ãẽxgacũgu pixĩgũxũ, rü noxretama pixĩgu i ngẽma itaarũ dĩeruãxũtanũxũ pixĩgũxũ. Natürũ woo ngẽmaãcü pixĩgũgu rü Tupana rü pexũ nidexechi na norũ duũxũgũ pixĩgũxũcax. ²⁷Rũ Tupana nayadexechi ga yema duũxũgũ ga togũ ga duũxũgũ nüxũ ixuxgu rü taxuũma icuãxũ. Rũ yemaãcü nanaxũ ga Tupana na naxãneẽxẽãxũcax i ngẽma duũxũgũ i nüxũ icuaxũchixũ. Rũ Tupana nayadexechi ga yema duũxũgũ ga togũ nüxũ ixuxgu rü turaexũ. Rũ yemaãcü nanaxũ ga Tupana na naxãneẽxẽãxũcax i ngẽma duũxũgũ i poraexũ. ²⁸Rũ Tupana nayadexechi ga yema duũxũgũ ga togũ nüxũ oexũ, rü ñoma i naãnewa taxuũma ixĩgũxũ. Rũ yemaãcü nanaxũ ga Tupana na taxuũma yixĩgũxũcax i ngẽma duũxũgũ i tacũ ixĩgũxũ. ²⁹Rũ ngẽmacax taxucũrũwama texé tũgu ticuaxũũ i Tupanapexewa. ³⁰Rũ nümatama ga Tupana nixĩ ga Ngechuchu ya Cristuarũ duũxũgũxũ pexũ yaxĩgũxẽẽxũ. Rũ tatanũwa nanamu ga Cristu na nüma tũxna naxããxũcax i cuax i aixcũma ixĩxũ, rü pecaduwa tũxũ ínanguxũxẽẽxũcax. Rũ nüma ya Cristu nixĩ i tũxũ namaxẽxẽẽxũ rü tũxũ yamexẽẽgũxũ na aixcũma ixũunexũcax i napexewa ya Tupana. ³¹Rũ ngẽmacax i Tupanaãrũ ore i ümatũxũwa rü ñanagürũ:

“Rü ngëxguma texé tügü
icuaxüüchaügu rü name nixĩ i
tórü Corixũ ticuaxüũ, erü nûma
nixĩ i tüxũ nangüxëëxũ”,
ñanagürü.

Cristu ga curuchawa ipotacüchiga

2 ¹Pa Chaueneëgüx, yexguma noxri
petanüwa chaxüxgu na pemaã nüxũ
chixuxüçax ga Tupanaârü ore i aixcûma
ixĩxũ i Cristuchiga, rü tama ñoma nüxũ
cuaxüchixürüüäcûma pemaã chidexa, rü
tama ore ga guxchaxümaã nixĩ ga pemaã
nüxũ chixuxũ. ²Yerü yexguma petanüwa
chayexmagu, rü Cristuchigaxüxicatama
pemaã chixu. Rü taxuüma ga tacü ga togu
charüxĩnü. Rü yemaäcü Ngechuchu ya
Cristu ga curuchawa ipotacüguxicatama
nixĩ ga charüxĩnüxũ. ³Rü yexguma
petanüwa chaxüxgu rü chauxçax rü
nataxuma ga chorü pora, rü chorü
muümaã pepexewa chidurux. ⁴Rü
yexguma pemaã chideaxgu rü pemaã nüxũ
chixuxgu ga Tupanaârü ore, rü tama ñoma
nüxũ cuaxüchixürüüäcûma pemaã nüxũ
chixu na yemaäcü pexü
chanangüchaüxëëxüçax na
peyaxögüxüçax. Natürü Tupanaãe i
Üünexüârü ngüxëëmaã rü Tupanaârü
poramaã nixĩ ga pexü
chanangüchaüxëëxũ. ⁵Rü yemaäcü
Tupanaârü poramaã pemaã nüxũ chixu ga
yema ore na Tupanagagu yĩxũ na nüxũ
peyaxögüxũ, rü tama ñoma i naãnecüãx i
duüxügüari cuágagu na yĩxũ.

Tupana rü Naãe i Üünexüwa nügü tüxũ nacuaxëë

⁶Natürü pemaã nüxũ chixu, rü
ngëxguma natanüwa changëxmagu i

ngëma duüxügü i marü meãma
yaxögüxũ, rü ngëxguma nixĩ i
chanangüxëëxũ i ngëma aixcûma taxũ i
cuax i maxũ i üünexüchiga ixĩxũ.
Natürü ngëma cuax rü tama ñoma i
naãnewa ne naxũ, rü bai i ñoma i
naãneârü äëxgacügü i paxa tá
iyarüxoxüwa ne naxũ. ⁷Natürü ngëma
cuax rü Tupanawa nixĩ i ne naxüxũ. Rü
ngëma cuax nixĩ ga noxri tauta naãne
üxgu Tupanaxicatama nüxũ cuáxũ ga na
ñuxäcü tá tüxna naxäãxũ i maxũ i
taguma gúxũ. ⁸Natürü yema Tupana
nagu rüxĩnüxũ, rü taxuüma ga ñoma ga
naãnecüãx ga äëxgacü nüxũ nacuax.
Yerü yexguma chi aixcûma nüxũ
nacuaxgügu ga yema Tupana nagu
rüxĩnüxũ rü täu chima curuchawa
nayapotagü ga guma mecü ya tórü Cori.
⁹Natürü yema Tupanaârü ore i ümatüxũ
nüxũ ixuxürüüäcü nangupetü. Erü norü
orewa rü ñanagürü:

“Rü ngëma duüxügü i Tupanaxũ
ngechaügüxüçax, rü nûma
nanamexëë i tacü i taxüema
nüxũ dauxũ, rü taguma texé
nüxũ ñnüxũ, rü bai i texé nagu
rüxĩnüxũ”,

ñanagürü i norü orewa. ¹⁰Rü ngëma
Tupana mexëëxũ naxçax i ngëma
duüxügü i nüxũ ngechaügüxũ, rü ñüxma
rü tüxũ nüxũ nacuaxëë i ngëma, yerü
núma nanamu ga Naãe i Üünexũ na
taxçax nangoxëëäxüçax. Rü ngëma Naãe
i Üünexũ rü guxüxüma nacuax, rü
äixrüxũ i ngëma Tupanaxicatama nüxũ
cuáxũ rü ta nüxũ nacuax. ¹¹Rü
duüxügütanüwa rü ðtexé nüxũ tacuax
na tacügu naxĩnüxũ i wüxi ya yatü? Rü
naãëxicatama nixĩ i nüxũ cuáxũ i ngëma

nagu naxīnūxū i ngēma yatū. Rū ngēxgumarūū ta Tupanaāē i Ūūnexūīcatama nixī i nūxū cuáxū na ſacūgu naxīnūxū ya Tupana. ¹²Rū yixema rū tama űoma i naānecūāx i naāē nixī i iyauxgūxū. Natūrū Naāē i Ūūnexū ga Tupana nūma muxū nixī ga iyauxgūxū, na aixcūma nūxū icuáxūcax i guxūma i ngēma mexūgū ga Tupana norū ngechaūmaā tūxna āmarexū. ¹³Rū űuxma na pemaā nūxū tixuxū i ngēmachiga, rū Tupanaāē i Ūūnexū toxna āxū i oremaā nixī i pemaā nūxū tixuxū. Rū tama ore i torū cuaxwa tayaxuxūmaā nixī i pemaā nūxū tixuxū. Rū ngēmaācū nūxū tixu i Tupanaāē i Ūūnexūārū ore namaā i ngēma duūxūgū i aixcūma Tupanaāē nawa ngēxmagūxū. ¹⁴Rū texē ya tama Tupanaāē i Ūūnexū tūmawa ngēxmaxē, rū taxucūruwa tanayaxu i ngēma Tupanaāē i Ūūnexū tūxū nguxēēxū, erū tūmacax ya yixema duūxē rū natūcaxmamare nixī. Rū tama nūxū tacuaxéga erū yixema Tupanaāē i Ūūnexū tūmawa ngēxmaxēīcatama tixī ya nūxū cuáxe na tanangugūxū na űuxū űaxūchiga yīxū i ngēma Tupanaāē i Ūūnexū tūxū nguxēēxū. ¹⁵Rū yixema duūxē ya Tupanaāē i Ūūnexū tūmawa ngēxmaxē, rū meā tanangugū i guxūma. Natūrū ngēma togū i duūxūgū i tama Tupanaxū cuaxgūxū, rū taxucūruwama tūmaārū maxūxū nangugū ya yixema duūxē ya aixcūma Tupanaāē tūmawa ngēxmaxē. ¹⁶Erū Tupanaārū ore i ūmatūxūwa rū űanagūrū:

“¿Texē nūxū tacuax na ſacūgu naxīnūxū ya tōrū Cori? ¿Rū texē nūxū tacuax na Tupanaxū taxucuxēxū?”

űanagūrū. Natūrū yixema nixī i aixcūma nūxū icuáxū i ngēma Cristu nagu rūxīnūxū.

Pauru rū Aporu rū wūxigu Tupanaāxū napuracūe

3 ¹Pa Chaueneēgūx, yexguma noxri petanūwa changuxgu, rū taxucūruwa ngēma duūxūgū i Tupanaāē nawa ngēxmaxūmaā chideaxgurūūācūma pemaā chidexa. Natūrū űoma i naānecūāx i tama Tupanaxū cuaxgūxūmaā chideaxgurūū nixī ga pemaā chidexaxū. Yerū pema rū yexwacax, peyaxōgū ga yexguma, rū yemacax yexwacax yaxōgūxūmaā chideaxgurūūācūma pemaā nūxū chixu ga Cristuchiga. ²⁻³Rū tauxchaxū ga oremaā pexū changūexēē, ngēxgumarūū i wūxi i ōxchana ega noxri nabuxgu rū naēgūnenixū ya tauxchaācū yaxaxīne nūxna taxā. Rū yemaācū tauxchaxū ga oremaā pemaā nūxū chixu ga Tupanaārū ore ga noxrix, yerū taxucūruwa nūxū pecuaxéga ga Tupanaārū ore ga guxchaxū. Rū űuxma rū ta tama nūxū pecuaxéga i Tupanaārū ore i guxchaxū, erū űoma tama yaxōgūxū i duūxūgūrūūtama pemaxē. Rū dūcax, ngēxguma űuxma rū ta pixāūxāchiwaxegu rū pegūmaā penuēgu, rū ngēmawa nangox na ngēma tama yaxōgūxūrūūtama nagu perūxīnūēxū rū űoma i naānecūāxruūtama na pemaxēxū. ⁴Rū ngēxguma petanūwa wūxie űagūgu rū: “Choma rū Pauruwe charūxū”, űagūgu, rū togue rū: “Choma rū Aporuwe charūxū”, űagūgu, rū ngēmawa nūxū tacuax na

ngẽma duũxũgũ i tama
yaxõgũxũrũtama na pemaxẽxũ. ⁵Rũ
ngẽxguma meã nagu rũxĩnũẽgu, ẽrũ
taçũ chixĩ i choma i Paurux? rũ ẽtaçũ
nixĩ i nũma i Aporux? Toma rũ
Tupanaãrũ duũxũgũmare tixĩgũ, rũ
togagu nixĩ ga nũxũ peyaxõgũxũ ga tórũ
Cori ya Ngechuchu. Rũ wũxichigũ ga
toma rũ tanaxũ ga yema puracũ ga tórũ
Cori toxna ãxũ. ⁶Rũ chauxũtawa nixĩ ga
nũxũ pexĩnũẽxũ rũ peyaxõgũxũ ga
Tupanaãrũ ore ga noxrix, rũ Aporu nixĩ
ga pexũ rũngũxẽẽcũ na yexeraãcũ meã
peyaxõgũxũ ga yema ore. Natürũ
Tupana nixĩ ga pexna naxãcũ ga maxũ.
⁷Rũ ngẽmacax woo yĩxema tũxira
duũxũgũmaã nũxũ ixuxe i Tupanaãrũ
ore rũ woo yĩxema wixwena yexeraãcũ
duũxũgũxũ ngũxẽẽxẽ, rũ taxuũma
tixĩgũ. Natürũ Tupana nixĩ ya guxũma
ũcũ, erũ nũma nixĩ i duũxũgũxũ
namaxẽẽxẽxũ. ⁸Rũ ngẽmaãcũ ya yĩxema
tũxira duũxũgũmaã nũxũ ixuxe i
Tupanaãrũ ore, rũ yĩxema wixwena
yexeraãcũ duũxũgũxũ ngũxẽẽxẽ rũ
tawũxigumare i ngẽma puracũwa.
Natürũ Tupana rũ tá tũxũ nanaxũtanũ i
tũmaãrũ puracũ ya wũxichigũ
ngẽxgumarũũ na ñuxãcũ nũxũ
tapuracũxũ. ⁹Rũ ngẽmaãcũ i choma i
Pauru rũ taeneẽ ya Aporu rũ wũxigu
Tupanaãxũ tapuracũ. Rũ ngẽmaãcũ
nixĩ i petanũwa napuracũxũ ya Tupana.
Rũ perũ maxũwa nixĩ i napuracũxũ na
nũma nanaxwaxexũãcũma pixĩgũxũcax.
¹⁰Rũ choma nixĩ ga Tupana choxũ muxũ
na chaxira pemaã nũxũ chixuxũcax ga
Cristuchiga. Rũ togũ nixĩ ga chowena
yexeraãcũ pexũ ngũxẽẽxẽxũ. Natürũ
guxãma ya texẽ ya naxũxe i ñaã puracũ

rũ tanaxwaxe i taxuãẽ na meã
tanaxũxũcax. ¹¹Rũ ñaã puracũ rũ
Ngechuchu ya Cristuwa nixĩ ga
inaxũgũxũ, rũ ngẽmacax taxucũrũwama
texẽ tayangucuchixẽẽ i to i tũxũ
maxẽxẽẽxũ. ¹²Rũ ñuxma na norũ puracũ
ixũxũ i wũxichigũ i yixema, rũ
tanaxwaxe i taxuãẽ na aixcũma meã
naxũxũ i ngẽma. Erũ yĩxema aixcũma
meã naxũxe i norũ puracũ, rũ ñoma
wũxi i ipataarũ urũũ i uirumũ rũ
dĩerumũ rũ nuta i mexẽchixũmaã
ũpataxũrũũ tixĩ. Natürũ yĩxema tama
aixcũma meã naxũxe i ngẽma Cristuarũ
puracũ rũ ñoma ipataarũ urũũ i chixexũ
i naĩ rũ naĩxãtũ rũ
dexnemenaxãmaremaã ũpataxũrũũ tixĩ.
¹³Natürũ ngẽxguma naguxgu i naãne, rũ
tá nangox na ñuxãcũ naxũãxũ i
Tupanaãrũ puracũ i wũxichigũ i duũxũ.
Erũ ngẽma ngunexũgu rũ tá nangẽxma
ya ũxũ ya taxũchine. Rũ ñoma taçũ
ũxũwa iguxũrũũ tá nixĩ i Tupana nũxũ
na ũxũ i wũxichigũ i duũxũarũ puracũ
na nũxũ nacuáxũcax ngoxi aixcũma
name rũ ẽxna tama. ¹⁴Rũ yĩxema
aixcũma meã naxũxe i Cristuarũ puracũ,
rũ yima ipata ya taixũne ya tama
ũxũmaã ixaxũnerũũ tá nixĩ i ngẽma
tũmaãrũ puracũ. Rũ tá Tupanaxũtawa
tanayaxu i tũmaãrũ natanũ naxcax i
ngẽma taxũxũ. ¹⁵Natürũ yĩxema tama
aixcũma meã naxũxe i ngẽma puracũ,
rũ yima ipata ya tama taixũne ya
ũxũmaã ixaxũnerũũ tá nixĩ i ngẽma
tũmaãrũ puracũ. Rũ tá ngẽxma
inayarũxomare i guxũma i ngẽma
taxũxũ. Rũ tũxicatama tãutãma tixa
ñoma wũxi i duũxũ i ũxũemawa
iyagoxũrũũ. ¹⁶¿Tama ẽxna nũxũ pecuax

i pema rü Tupanapata na pixīgüxũ, rü Tupanaãe i Üünexũ rü petanüwa na namaxũxũ? ¹⁷Rü ngëxguma texé pexũ chixetanüxëngu, rü Tupana tá tüxũ napoxcu, erü Tupanapata ya nawa namaxũne rü naxüüne. Rü pematama nixĩ ya yima Tupanapata na pixīgüxũ. ¹⁸Tama name i texé tügütama tawomüxëe. Rü ngëxguma petanüwa texé tügügu rüxĩnügü na wüxi i duũxũ i nüxũ cuáxe na tiĩxũ i ñoma i nañewa, rü name nixĩ i ñoma taxuũma tacuáxũrũ tügü tixĩxëe. Rü ngëxguma tá nixĩ i wüxi i duũxũ i aixcuma nüxũ cuáxe tá tiĩxũ. ¹⁹Erü ñoma i nañeärü cuax rü wüxi i ngëãemare nixĩ i Tupanacax. Erü Tupanaärü ore i ümatüxüwa rü ñanagürü:

“Rü ngëma duũxügü i nügügu rüxĩnüxũ na nüxũ cuaxüchigüxũ yĩxũ, rü norü cuaxgutama ñanatüxëe ya Tupana”,

ñanagürü. ²⁰Rü ngëma ore rü ñanagürü ta:

“Tórü Cori ya Tupana rü nüxũ nacuax na taxuwama namexũ i ngëma nagu naxĩnüxũ i ngëma duũxügü i nüxũ icuaxüchixũ”, ñanagürü. ²¹Rü ngëmacax tama name na texé tügü icuaxüxũ na tacü rü yatüarü ngüxëetaewe na tarüxüxücax. Erü Tupana rü marü pexna nanaxã i güxüma na pexrü yĩxücax. ²²Rü ngëmacax i choma i Pauru, rü taeneë ya Aporu, rü taeneë ya Pedru, rü ñoma i nañe, rü torü maxũ, rü torü yu, rü ñomatama i ngunexũ, rü moxüärü ngunexũ, rü güxüma i ngëma rü pexrü nixĩ. ²³Rü pematama rü Cristuarü pixīgü. Rü Cristu rü Tupanaärü nixĩ.

Yema ngüexügü ga Ngechuchu imugüxüärü puracüchiga

4 ¹Rü ngëmacax tanaxwaxe i tomaã nagu perüxĩnüe na Cristuarü puracütanüxümare na tixīgüxũ. Rü nüma nixĩ i toxũ namuxũ na pexũ tangüxëxücax ga yema ore ga noxri Tupanaxicatama nüxũ cuáxũ. ²Rü ngëxguma texé tacü rü puracü tüxũ üxëngu, rü tanaxwaxe i aixcuma tayanguxëe i ngëma puracü i tüxna taxãxũ na ngëmaäcü inawéxücax na aixcuma wüxi i duũxũ i mexũ ixĩxũ. ³Rü ngëmacax i ñuxma na meã chayanguxëechaüxũ i ngëma puracü i Tupana choxna äxũ, rü taxucaxma chaugücax chaxoegaãe ega woo choxna pecagu rü exna tacü rü äëxgacügü choxna caxgu naxcax i ngëma puracü i chaxüxũ. Rü woo i chomatama rü taxuxücaxma íchicuax na ngextá chixri chanaxüxũ i ngëma puracü. ⁴Natürü ñuxma na chomatama nagu charüxĩnüxũ na nataxuũma i chorü chixexũ i Tupanapexewa, rü tama ngëmacax Tupana choxũ nadau na changearü pecaduáxũ. Erü nümatama ya tórü Cori ya Tupana nixĩ i aixcuma choxũ nacuáarü maxüáxũ. ⁵Rü ngëmacax tama name na texëxü pengugüarü maxüáxũ naxüpa na núma naxüxũ ya tórü Cori. Natürü name nixĩ i nüxũ ípenanguxëe, erü nüma tá nixĩ i nangoxëëxũ i güxüma i ngëma ñuxma icúxũ rü güxüma i ngëma duũxügü naãewa nagu rüxĩnüxũ. Rü ngëxguma tá nixĩ ya Tupana i tümamaã nataãëxũ ya wüxichigü ya yíxema aixcuma mexũ ügüxe. ⁶Pa Chaueneëgüx, perü mexücax

nixĩ i pemaã nüxũ tixuxũ i ngẽma ore na ñuxãcü Tupana naxwaxexũ na pemaxẽxũ. Rũ choma rũ Aporu nixĩ i perũ cuaxruũgũ tixĩgũxũ na towa pengúexũ na Tupanaãrũ ore pemaã nüxũ ixuxũrũ penaxũxũ. Rũ ngẽmacax tama name na wũxi i perũ nguxẽtaexũmaã petaãẽgũxũ rũ to rũ nüxũ pexoexũ. ⁷Rũ ñuxma rũ pexna chaca, ¿rũ texẽ tixĩ ya yĩxema togũarũ yexera pexũ ixĩxẽẽxẽ? ¿Rũ ñacũ rũ cuax i pexũ ngẽxmaxũ i tama Tupana nügũchiga pexna ãxũ? Rũ ñuxma na nũma pexna naxããxũ i ngẽma cuax ¿rũ tũxcũũ pegũ picuaxũũgũ ñoma pematama perũ poramaã penayaxuxũrũ? ⁸Rũ pegũgu perũxĩnũẽgu rũ aixcũma marũ meãma Tupanaxũ picuaxũchi rũ marũ pexũ nangẽxma i guxũma i ñacũ i penaxwaxexũ na naxũtawa pengugũxũcax. Rũ pegũgu perũxĩnũẽgu rũ ãẽxgacũgũ i taxũrũũ pixĩgũ rũ taxuũma i toxũtawa penaxwaxe i ñuxmax. ¡Chierũ aixcũma Tupanaxewewa ãẽxgacũgũ pixĩgũgu na toma rũ ta wũxigu pemaã ãẽxgacũgũ na tixĩgũxũcax! ⁹Rũ toma na Ngechuchu toxũ imugũxũ, rũ chauxcax rũ wixwe toxũ nawogũ ya Tupana. Rũ ñoma poxcuexũ i yuewa ãxũrũ tixĩgũ. Rũ ñoma wũxi i ñacũ i nüxũ nacugũexũrũ tixĩgũ i napexewa i Tupanaãrũ orearũ ngerũgũ i daxũcũãx, rũ napexewa i ñoma i naãnecũãx i duũxũgũ, rũ napexewa i guxũma i ñacũ i Tupana üxũ. ¹⁰Rũ ñuxma na Cristuwe tarũxĩxũ, rũ ngẽmacax taxuũma icuáxũ toxũ nawogũ i duũxũgũ, natũrũ i pema rũ pegũgu perũxĩnũẽgu rũ guxũxũma pecuax i

Cristuchiga. Toma nüxũ tacuax na duũxũgũpexewa taturaexũ, natũrũ i pema rũ pegũgu perũxĩnũẽ na aixcũma peporaexũ. Rũ duũxũgũ toxũ naxo, natũrũ pexũ nangechaũgũ. ¹¹Rũ ñuxma rũ ta tama inayacuax na ngúxũ tingegũxũ, erũ ñuxma rũ ta taiya toxũ nangux, rũ tiñawae, rũ tangexchiru. Rũ duũxũgũ rũ chixri tomaã nachopetũ, rũ tangepata. ¹²Rũ tipae na yeũcũrũ toxmexmaã tapuracũeechaxũ. Rũ duũxũgũ rũ ñacũ tomaã nixugũe, natũrũ i toma rũ mexũ i oremaã tanangãxũgũ. Rũ towe ningẽxũtanũ, natũrũ yaxna namaã taxĩnũẽ. ¹³Rũ chixexũmaã tochiga nidexagũ, natũrũ i toma rũ meã nachiga tidexagũ. Rũ ñoma guxchirexũ nadaugũxũrũũacũma tomaã namaxẽ, rũ ñoma i duũxũgũ i taxuwama mexũrũũ tomaã nixĩgũ. Rũ ñuxma rũ ta rũ ngẽmaãcü tomaã namaxẽ. ¹⁴Tama pexcax chanaxũmatũ i ñaã popera na pexũ chaxãneẽxẽxũcax. Natũrũ pexcax chanaxũmatũ na pexũ chixucuxẽgũxũcax chauxacũgũxũchirũũ, erũ pexũ changechaũ. ¹⁵Erũ woo nangẽxmagu i muxũma i perũ nguxẽẽruũgũ i Cristuchiga pexũ ngúxẽẽxũ, natũrũ chaxicatama nixĩ i penatũ chiĩxũ ga Cristuxũ na peyaxuxũwa. Yerũ chauxũtawa nixĩ ga noxri ga penayaxuxũ ga Ngechuchu ya Cristuarũ ore i tũxũ maxẽxẽẽxũ. Rũ ngẽmacax chaxicatama nixĩ i penatũ chiĩxũ i perũ õwa. ¹⁶Rũ ngẽmacax pexũ chacaaxũ na choma chamaxũxũacũma meã na pemaxẽxũcax. ¹⁷Rũ ngẽmacax pexũtawa chanamu ya Timutẽu ya poraãcü nüxũ changechaũcü ya chaune ixĩcü i tórũ Coriarũ orewa. Rũ nũma rũ

aixcūma meā nayanguxēē i guxūma i ngēma nawa chanamuxū. Rū nūma tá pexna nūxū nacuaxāchixēē na ñuxācū Ngechuchu ya Cristu naxwaxexūācūma meā chamaxūxū ngēma guxūnema ya tupauca i íchixūgūxūwa chanangúexēēxūrū. ¹⁸Rū ñuxre i pemagū rū pegū picuaxūūgū, erū nagu perūxīnūē na tāūtáma pexūtawa íchayadauxū. ¹⁹Natürri ngēxguma nanaxwaxegu ya tórü Cori, rū paxa tá ngēma chaxū na pexū íchayadauxūcax. Rū ngēxguma rū tá chomaxūchi nūxū chadau ngoxi aixcūma nūxū nangēxma i Tupanaārū pora rū exna nidexagūmare i ngēma duūxūgū i nūgū icuaxūūgūxū. ²⁰Erū Tupana āēxgacū íyīxūwa rū tama dexagūmare nixī natürri ngēma nangēxma i pora. ²¹¿Rū ñuxma rū tacū exna nixī i penaxwaxexū i pemagū? ¿Penaxwaxe na pexū chingagūxū i ngēxguma ngēma changuxgu, rū exna penaxwaxe na pexū changechaūācūma rū pemaā chamecūmaācūma pexū na íchayadauxū?

Duūxūgū i chixri maxēxūchiga

5 ¹Rū duūxūgū nūxū nixugūgū rū wūxi i yatū i petanūwa rū naērūcūmaātama naxāmax. Rū ngēma nixī i pecadu i poraācū chixexūchixū, erū woo ngēma duūxūgū i tama yaxōgūxūtanūwa rū tama ngēmaācū nangupetū. ²¿Rū ñuxācū i pema i ngēxguma i pegū picuaxūūgūamaxū? Rū narūmemaē chi nixī na poraācū pengechaūgūxū. Rū ngēma yatū i ngēma chixexū ūxū rū name nixī na ípenamuxūchixū i petanūwa. ³Rū woo tama petanūwa changēxmagu i chomax,

natürri guxūguma pegu charūxīnū. Rū ñoma pexūtawa changēxmaxūrū rū tórü Cori ya Ngechuchu ya Cristuégagu pemaā nūxū chixu na tacū tá namaā pexūxū i ngēma duūxū. ⁴Rū name nixī i tórü Cori ya Ngechuchu ya Cristuégagu pengutaquexegū. Rū nūma ya tórü Cori ya Ngechuchu rū tá napetanūgu na pexū naporaexēēxūcax. Rū choma rū tá pexna chacuaxāchi i chorū yumūxēwa. ⁵Rū ngēma norū poxcu i tá nūxna pexāxū i ngēma yatū, rū ngēma tá nixī na ípenamuxūchixū i petanūwa na Chataná ngūxū nūxū ingexēēxūcax. Rū ngēmaācū tá inayarūxo i naxūneārū ngūchaū i chixexū, natürri naāē rū tá namaxū i ngēxguma wena nūma naxūxgu ya tórü Cori ya Ngechuchu. ⁶iRū tama name i pema rū pegū picuaxūū naxcax i ngēma pexūxū! ¿Tama exna nūxū pecuax i ngēma ore i ñaxū:

“Wūxi i íraxū i pāūārū puxēēruū rū taxūma i pāūchara nīpuxēē”, ñaxū? ⁷Rū ngēmacax name nixī i nūxū perūxoe i guxūma i nuxcūmaūxū i pecūma i pexū chixexēēxū. Rū ngēxguma ngēmaācū penaxūxgu, rū ñoma ngexwacaxūxū i pāū i ngearū puxēēruūāxū i Ūpetūchigaarū petawa ingōxūrū tā pime. Rū ñuxma i pema rū aixcūma ngexwacaxūxū i duūxūgū pixīgū, yerū Cristu rū ñoma wūxi i carerurū marū tachicū tórü pecaduacax nayu. ⁸Rū ngēmacax name nixī i nūxū tarūxoe i nuxcūmaūxū i tacūma i chixexūgū rū aixcūma Tupanagu tarūxīnūē rū meā naxcax tamaxē, erū ngexwacaxūxū i norū duūxūgū tixīgū. ⁹Nūxīraūxū ga chorū poperawa rū pemaā nūxū chixu na tama natanūgu pexāgūxū i ngēma duūxūgū i naī i

ngemaā naxūneārū ngūchaū ügūxū.
¹⁰Natürü na yema ñachaxū pexū, rü tama pemaā nūxū chixu na nūxna pixīgachitanūxūchixū i ngēma duūxūgü i tama yaxōgūxū i naī i ngemaā maxēmarexū, rü exna ngēma duūxūgü i guxūma i tacü nügüna nugüchaūgūxū, rü exna ngītaaxgūxū, rü exna ngēma duūxūgü i tupanetanachicinaxāxū icuaxūügūxū. Erü ngēxguma chi naxchaxwa ipechoūxgu i ngēma duūxūgü, rü chi taxucürüwa i ñoma i naānewa pengēxmagü. ¹¹Natürü yexguma pemaā nūxū chixuxgu na tama natanügu pexāgūxū i ngēma duūxūgü i chixri maxēxū, rü nachiga chidexa i ngēma duūxūgü i nügü ixugūxū na peeneēgü i yaxōgūxū na yixīgūxū natürü naī i ngemaā maxē, rü exna aüexū, rü exna tupanetanachicinaxāxū icuaxūügūxū, rü exna oregütaaxgūxū, rü exna ngāxēwaxegūxū, rü exna ngītaaxgūxū. Rü ngēma duūxūgü nixī i pemaā nūxū chixuxū na tama namexū na natanügu pexāgūxū rü bai i namaā na pechibüexū.
¹²⁻¹³Erü tama choxmexwa nangēxma na nūxna chaçaxū i ngēma duūxūgü i tama Tupanaāxū yaxōgūxū. Rü Tupana tá nixī ya nūxna çacü i ngēma duūxūgü. Natürü i pema rü pemexwa nangēxma na nūxna peçaxū i ngēma peeneēgü i yaxōgūxū i tama meā maxēxū. Rü name nixī na petanüwa ípenamuxūchixū i ngēma duūxū i chixri maxēchaxū.

**Ngēxguma tacü rü guxchaxū tūxū
 ngēxmagu taeneēmaā, rü tama name i
 āēxgacügü i tama yaxōgūxūpexewa
 tayamexēē i ngēma**

6 ¹Rü ngēxguma wūxie i pema pexū nangēxmagu i tacü rü guxchaxū i wūxi i peeneē i yaxōxūmaā, ñrū tüxcüü

wūxi i āēxgacü i tama yaxōxūārū ngūxēēçax ípeyaca na nūma pexū namexēēāxūçax i ngēma perü guxchaxūgü? ÑRü tama exna inamexū i ngēma peeneēgü i yaxōgūxū na namexēēgūxū i ngēma perü guxchaxūgü? ²ÑTama exna nūxū pecuax na yixema na yaxōgūxū tá yīxū i naāneārū guxgu nūxna icagūxū i guxūma i ñoma i naānecūāx i duūxūgü? Rü ñuxma na pema tá yīxū i ñoma i naānecūāx i duūxūgūxū picagūxū, ñrū tüxcüü taxucürüwa i pematama penamexēē i ngēma perü guxchaxūgü i írachirēxū? ³ÑTama exna nūxū pecuax rü woo ngēma daxūcūāx i Tupanaārū orearü ngeruügü, rü yixema tá yīxū i nūxū icagūxū? Rü ngēmacax nixī i yexeraācü pemexwa nangēxmaxū na ñuxācü penamexēēxū i ngēma guxchaxūgü i ñoma i naānewa pexū ngēxmagūxū. ⁴Rü ngēmacax, ngēxguma tacü rü guxchaxū pexū ngēxmagu i ñoma i naānewa, ñrū tüxcüü i ngēma āēxgacügü i tama yaxōgūxūxūtawa pegü ípeyaxuaxūgūxū na pexū namexēēgūāxūçax i ngēma? ⁵Rü pemaā nūxū chixu i ngēma ore na pexāneēxūçax. ÑExna tataxuma i petanüwa ya wūxie ya nūxū cuāxe na tanamexēēxū i ngēma guxchaxūgü i petanüwa ngēxmaxū? ⁶Rü tama pegūmaā penuēxīcatama, natürü naétü rü āēxgacügü i tama yaxōgūxūxūtawa pexī na penamexēēxūçax i ngēma perü guxchaxūgü. ⁷Rü ngēma na pegūmaā penuēxū, rü ngēma rü poraācü chixexū nixī. ÑRü tüxcüü tama yaxna namaā pexīnūē i ngēma guxchaxūgü i peeneē pemaā üxū? ÑRü tüxcüü tama namaā

peporae ega texé perū tacūcax ngīxgux?

⁸Natürü i pema rü peeneēmaātama chixexū pexüe, rü nüxū pengīx i ngēma peeneēgü i yaxōgūxū. ⁹⁻¹⁰¿Tama exna nüxū pecuax na ngēma duūxūgü i chixexū ügūxū rü nataxuxūtama i nachica i ngextá Tupana āēxgacū íyīxūwa? iRü tama name i pegütama pewomūxēēgü! Erü ngextá Tupana āēxgacū íyīxūwa rü nataxutáma i nachica i ngēma duūxūgü i naí i ngemaā ipexū, rü ngēma duūxūgü i tupanetanetchicūnaxāxū icuaxūügūxū, rü ngēma duūxūgü i naxmaxēchita rü exna nateechita ngēāēxū, rü ngēma yatügü i naxrüü yatūxūmaā ngēāēxū, rü ngēma ngítaaxgūxū, rü ngēma duūxūgü i nügūnaxica nanuxūchixū i norü ngēmaxūgü, rü ngēma duūxūgü i ngāxēwaxegūxū, rü ngēma duūxūgü i oregūtaaxgūxū, rü ngēma duūxūgü i womūxēēwaxegūxū. Rü guxūma i ngēmagü rü nataxutáma i nachica i ngextá Tupana āēxgacū íyīxūwa. ¹¹Rü yexgumarüütama pixīgü ga ñuxre ga pema ga ūpax. Natürü i ñuxma ya Tupana rü marü pexū ínanapi i perü chixexū na noxrūxicatama pixīgūxūcax. Rü ñuxma rü aixcūma napexewa pime yerü Naāē i Üünexū rü tórü Cori ya Ngechuchu ya Cristuégagu marü perü pecaduna pexū ínanguxūxē.

Ñuxācū naxūüne i taxūne

¹²Rü ñuxre i pema rü ñaperügügü:

“Rü marü name na chanaxūxū i ngēma chanaxwaxexū”, ñaperügügü. Rü aixcūma nixí i ngēma, natürü tama guxū i ngēma ixügūxū rü tüxū name. Rü aixcūma nixí i Tupana choxū

ínguxuchixēēxū na chanaxūxūcax i ngēma chanaxwaxexū, natürü tama name na tacū rü chixexūgu chaugü changuxēēxū na chomaā inacuáxūcax.

¹³Rü ngēxgumarüü tá rü ñuxre i duūxūgü rü ñanagürügü:

“Rü ōna rü taxūnecax nixí, rü taxūne rü ōnacax nixí”, ñanagürügü. Rü aixcūma ngēmaācū nixí, natürü ya Tupana rü tá inayanaxoxē i guxūma i ngēma. Rü taxūne rü tama naí i ngemaā namaā na ingēāēmarexūcax nixí. Erü taxūnemaā nixí i naxūxū i tórü Coriarü ngúchaū. Rü tórü Cori nixí ya taxūnexū maxēēcū. ¹⁴Rü yema Tupana wena namaxēēxūrüü ga tórü Cori ya Ngechuchu, rü ngēxgumarüü tá ta norü poramaā wena tüxū namaxēxē. ¹⁵¿Rü tama exna nüxū pecuax na ngēma pexene rü Cristuarü na yīxū? ¿Rü ñuxācū i ngēma chaxune i Cristuarü ixīxū rü ngexū i ngēāēxūmaā inapexū? Taxucürüwama ngēmaācū nixí. ¹⁶¿Rü exna tama nüxū pecuax ega wūxi i ngexū i ngēāēxūmaā inapexgu ya wūxi ya yatü rü ngēma taxre i naxūne rü wūxitama i naxūne yīxū? Erü Tupanaārü ore i ūmatūxūwa rü ñanagürü:

“Ngēma taxre i naxūne rü wūxitama i naxūne tá nixí”,

ñanagürü. ¹⁷Natürü ngēxguma wūxi i duūxū rü tórü Cori ya Cristuaxū yaxōōxgu, rü ngēma naāē i ngēma duūxū rü Cristuāēmaā wūxigutama narūxīnūē. ¹⁸Rü ngēmacax name nixí na nüxū perūxoexū i pexeneārü ngúchaū na pexūxū. Rü guxūma i togü i pecadu i wūxi i duūxū üxū rü tama naxūnexū nachixexē. Natürü ngēma na naí i

ngemaã nangẽãẽxũ rü ngẽma waxi nixĩ i naxũnexũ chixexẽẽxũ. ¹⁹¿Tama ẽxna nũxũ pecuax i pexene rü Tupanaãẽ i Üünexũpata na yĩĩxũ? Rü pegu nixĩ i naxãchiũxũ i ngẽma Naãẽ i Üünexũ i Tupana pexna muxũ. Rü ngẽmacax i pema rü tama pegüarü yoratama pixĩgü. ²⁰Erü Tupana rü marü pexcax nataxe rü poraãcü nũxũ petatanü. Rü ngẽmacax penaxwaxe i ngẽma pexenemaã meã Tupanacax pemaxẽ na ngẽmaãcü namaã penataxẽẽxũ ya Tupana.

Ucuxẽgü i ãmaxchiga rü ätechiga

7 ¹Rü ñuxma rü tá pexũ changãxũ ga yema ãmaxchiga ga choxna naxcax pecaxũ ga perü poperawa. Rü narümemaẽ chi nixĩ i noxtacüma tama naxãmax ya yatü. ²Natürü ngẽma na naxũneärü ngüchaũ na naxügümarexũ i duũxũgü, rü narümemaẽ nixĩ i wüxichigü ya yatü rü na naxãmaxũ, rü wüxichigü i nge rü na naxãtexũ. ³Rü yima yatü ya ãmacü rü taxucürüwama naxmaxna nügü ninuxũ. Rü ngẽma nge i ätecü rü taxucürüwama ngĩtena ngĩgü iyanuxũ. ⁴Erü ngẽma nge i ätecü rü tama ngĩgüxũneärü yoratama iyixĩ, erü ngĩte nixĩ ya ngĩxĩneärü yora ixĩcü. Rü ngẽxgumarüü ya ngĩte rü tama nügüxũneärü yora nixĩ, erü naxmax iyixĩ i naxũneärü yora ixĩcü. ⁵Rü tama name i wüxi ya yatü rü namaxna nügü ninuxũ, rü ẽxna wüxi i ngecü rü ngĩtena ngĩgü iyanuxũ, ega tama nügümaã namexẽẽãgu na ñuxre i ngunexũ tama nügümaã namaxẽxũ naxcax na nayumüxẽgüxũ. Rü ngẽmawena rü name nixĩ na wenaxärü noxrirüü nügümaã namaxẽxũ na tama Chataná nüxna ñnũxũcax na chixexũgu nayixẽẽãxũcax. ⁶Rü guxũma i ñãã ore i

pemaã nüxũ chixuxũ i ãmaxchiga rü ätechiga rü tama wüxi i mu nixĩ i ngẽma. Natürü pemaã nüxũ chixumare na nüxũ pecuãxũcax na namexũ i ngẽmaãcü na penaxiũxũ. ⁷Rü chomatama nagu charüxĩnũ rü chierü name nixĩ ega choma chamaxũxũrüü namaxẽgu i guxũma i duũxũgü. Natürü Tupana rü wüxichigü i duũxũna nanaxã i nacüma na ñuxãcü namaxẽxũcax rü ñuxãcü nagu naxĩnũxũcax. Rü ngẽmacax tama guxãma tawüxigu. ⁸Rü ngẽma ngẽmaxgüxũ rü ngetegüxũ rü yutegüxũ rü namaã nüxũ chixu rü narümemaẽ nixĩ i chauxrüü tama naxãmax rü tama naxãte. ⁹Natürü ngẽxguma wüxi i duũxũ taxucürüwa naxũneärü ngüchaũmaã naporagu, rü name nixĩ na naxãmaxũ rü ẽxna naxãtexũ. Erü narümemaẽ nixĩ i noxtacüma naxãmax rü ẽxna naxãte na tama yeücü rü ngẽmagu naxĩnũẽchaxũcax. ¹⁰Natürü yĩxema marü ãmaxẽ rü ätexe, rü tũmamaã nüxũ chixu na tama namexũ na tũmatexũ na ítatãxũ. Rü ngẽma mu rü tórü Coriarü mu nixĩ, rü tama choxrü nixĩ. ¹¹Natürü ngẽxguma chi ngĩrüächi wüxi i ngexũ natexũ ítaxgu, rü name nixĩ i noxtacüma nangete rü ẽxna wena natecax nataegu. Rü ngẽxgumarüü ta ya yatü rü tama name i namaxũ ínatax. ¹²Rü ñuxma rü choxũ nangẽxma i wüxi i ore i tũmacax ya yĩxema ãmaxẽ ngĩmaã i wüxi i nge i tama yaxõxcü. Rü ngẽma ore rü choxrütama nixĩ rü tama tórü Coriarü nixĩ. Rü ngẽxguma wüxi ya yatü ya õcü ngĩmaã ãmaxgu i wüxi i nge i tama yaxõxcü, rü tama name i ngĩxũ ínatax, ega ngĩma rü aixcüma namaã naxãtechaũgu. ¹³Rü ngẽxguma wüxi i nge i yaxõxcü ätegu namaã ya wüxi ya yatü ya tama yaxõcü, rü tama name i ínatax ya yima ngĩte ega

nüma ya yima yatü rü aixcüma ngĩmaã naxãmaxchaũgu. ¹⁴Rü yima yatü ya tama yaxöcü, rü namax i yaxöxcügagu Tupana nüxü nacua. Rü ngẽma ngecü i tama yaxöxcü, rü ngĩte ya yaxöcügagu Tupana ngĩxü nacua. Erü ngẽxguma chi tama ngẽmaãcü yixĩgu, rü chi ngẽma naxãcügi rü duĩxũgi i tama yaxögũxũãcügürüi tá nixĩgi. Natürü i ñuxma ya naxãcügi rü marü Tupana tüxü nacua. ¹⁵Natürü ngẽxguma yima yatü ya tama yaxöcü rü namaxü ínatáxchaũgu rü inoxtacüma ngĩxü ínatá! Rü ngẽxgumarüi ega ngẽma ngecü i tama yaxöcü rü ngĩtexü ínatáxchaũgu, rü inoxtacüma ngĩtexü ínatá! Rü ngẽxguma ya yima yatü ya yaxöcü rü marü name ega wena naxãmaxgu. Rü ngẽma ngecü i yaxöcü rü marü name ega wena naxãtegu. Erü Tupana pexü nidexechi na meã pegümaã pemaxẽxũca. ¹⁶Rü ngẽmacax, Pa Ngecü i Tupanaãxü Yaxöxcüx, rü ngẽxguma cute i tama yaxöxü cuxü ítáxchaũgu, rü narümetaẽ nixĩ i tama cunachuxu, erü tama nüxü cucua. ngoxi tá cunamaxẽ i ngẽma cute rü exna tama. Rü cumax, Pa Yatü ya Yaxöxcüx, rü ngẽxguma cuxmax i tama yaxöxü cuxü ítáxchaũgu, rü narümetaẽ nixĩ i tama cunachuxu, erü tama nüxü cucua. ngoxi tá cunamaxẽ i ngẽma cuxmax rü exna tama. ¹⁷Rü ñuxma rü pemaã nüxü chixu rü nüma ga Tupana rü wüxichigü ga duĩxẽna nanaxã ga tũmaãrü cuax na tũmaãrü maxũmaã itacuáxũca rü meã tanaxũxũca i ngẽma puracü ga noxri tüxü yexmaxü ga tauta Tupana tũmacax caxgu. Rü ngẽma nguxẽetae nixĩ i namaã chanangüexẽxü i guxũma i yaxögũxü i wüxichigü ya tupaucawa ngẽmagũxü. ¹⁸Rü ngẽxguma

Tupana naxcax caxgu i wüxi i duĩxü i marü Yudfugürüi íwiechaxmüpexechiraũxü, rü nüétama nixĩ ega ngẽmaãcüta yixĩgu. Rü ngẽxguma Tupana nayauxgu i wüxi i duĩxü i tama íwiechaxmüpexechiraũxü, rü nüétama nixĩ ega ngẽmaãcüta yixĩgu. ¹⁹Erü Tupanapexewa rü nüétama nixĩ ega wüxi i duĩxü rü ínawiechaxmüpexechiraũgu rü exna tama. Erü ngẽma Tupana aixcüma naxwaxexü nixĩ na naga naxĩnũxü i wüxichigü i duĩxü. ²⁰Rü wüxichigü i duĩxü rü name nixĩ i nawatama napuracü ga yema puracü ga nüxü yexmaxü ga yexguma Tupana noxri naxcax caxgu. ²¹Rü yexguma wüxi ga coriarü duĩxü quixĩyane Tupana cuxcax caxgu, rü tama name i ngẽmacax cuxoegaãẽ. Natürü ngẽxguma cuxü natauxchagu na nüxna ícunguxuchixü i ngẽma cori, rü marü name na ícunguxuchixü. ²²Rü cuma ga na cucoriãxyane cuxcax naçaxü ga Tupana, rü name nixĩ i nüxna cucuaxãchi na Cori ya Cristu pecaduwa cuxü ínguxuchixẽxü. Rü cuma ga na cungearü coriãxyane cuxcax naçaxü ga Tupana, rü name nixĩ i nüxna cucuaxãchi na tórü Cori ya Cristuarü duĩxü quixĩ i ñuxma na nüxü cupuracũxũca. ²³Tupana rü marü pexcax nataxe rü poraãcü nüxü petatanü. iRü ngẽmacax i ñuxma rü tãütama naga pexĩnüe i ngẽma duĩxũgi i wenaxãrü ñoma i naãneãrü chixexũwa pexü gagüchaũxü! ²⁴Rü name nixĩ, Pa Chaueneẽgũx, i wüxichigü i pema rü meã Tupanapexewa penaxüama ga yema puracü ga pexü yexmaxü ga yexguma noxri Tupana pexcax caxgu. ²⁵Rü ñuxma rü tá pemaã nüxü chixu i nachiga i ngẽma duĩxũgi i ngẽmagũxü rü ngetegũxü. Rü

tórü Cori ya Ngechuchu rü taxuũma i mu choxna naxã i ngẽmachiga. Natürü tá pemaã nüxũ chixu i ñuxácü nagu charüxĩnũ i ngẽmachiga. Rü ngẽma chorü ore rü aixcũma nixĩ erü choma nixĩ i wüxi i duũxũ ga nüxũ changechaũtũmũũãcũma choxũ nayaxuxũ ga tórü Cori. ²⁶Yixema na yaxõgũxũ rü ñuxma rü poraãcü guxchaxũgũ tüxũ nangẽxma. Rü ngẽmacax chauxcax narũmemaẽ i tama nixãmax i ngẽma yatũgũ i ngẽmaxgũxũ. ²⁷Rü ngẽxguma marü cuxãmaxgu rü tama name i ngĩxũ ícutax. Natürü ngẽxguma cungẽmaxgu rü narũmemaẽ i tama cuxãmax. ²⁸Natürü ngẽxguma cuxãmaxgu rü tama pecadu nixĩ i ngẽma. Rü ngẽxguma wüxi i paxũ átegu rü tama pecadu nixĩ i ngẽma. Natürü ngẽma ixãmaxgũxũ rü ixãtegũxũ rü tá nayexera i norü guxchaxũgũ i ñoma i naãnewa, rü ngẽma nixĩ i tama chanaxwaxexũ na nüxũ nangupetũxũ. ²⁹Pa Chaueneẽgũx, pemaã nüxũ chixu rü tama muxũ i ngunexũ tüxũ nangẽxma na naxũxũcax i Tupanaãrü puracü. Rü ngẽmacax ya yixema ixãmaxgũxe rü name nixĩ i meã tanaxũgũ i Tupanaãrü puracü ñoma tangẽmaxgũxũrũ. ³⁰Rü yixema ngexwaca yutanũgũxe rü yixema peta ügũxe rü yixema itaxegũxe, rü tama name i ngẽmacax Tupanaãrü puracü na ítangẽxgũxũ. ³¹Rü yixema tüxũ nangẽxmaxẽ i tũmaãrü ngẽmaxũgũ i ñoma i naãnewa, rü tama name i ngẽmacax Tupanaãrü puracü na ítangẽxgũxũ. Erü ñoma i naãne i ñuxma nüxũ idauxũ rü paxa tá nagux. ³²Rü tama chanaxwaxe na tacũcax pexoegaãẽgũxũ. Rü ngẽxguma wüxi i yatü ngẽmaxgu, rü Tupanaãrü puracũgu narũxĩnũ rü nagu narũxĩnũ na

ñuxácü Tupanaãrü ngúchaũ naxũxũ. ³³⁻³⁴Natürü ngẽxguma naxãmaxgu i wüxi i yatü, rü ñoma i naãneãrü ngẽmaxũgu narũxĩnũ rü nagu narũxĩnũ na ñuxácü namaxãrü ngúchaũ naxũxũ. Rü ngẽmaãcü muxũgu narũxĩnũ. Rü ngẽxgumarũü ta nixĩ i ngexũgũ. Rü ngẽma ngexũ i ngetexũ rü Tupanaãrü puracũgu narũxĩnũ, erü marü Tupanana nügũ naxã rü guxũ i naxũnemaã rü naãemaã naxcax namaxũ. Natürü ngẽma ngexũ i átexũ rü ñoma i naãneãrü ngẽmaxũgu narũxĩnũ, rü nagu narũxĩnũ na ñuxácü natearü ngúchaũ naxũxũ. ³⁵Rü perü mexũcax nixĩ i pemaã nüxũ chixuxũ i ngẽma, rü tama pexna na chanachuxuxũcax nixĩ. Natürü ngẽma ñacharũgũ na meã pemaxẽxũcax rü aixcũma penaxũxũcax i tórü Coriarü puracü. ³⁶Rü ngẽxguma texé nagu rüxĩnũgu na tũmaxãcü rü marü na napaxũ, rü tũmacax rü marü namexgu na naxãtexũ, rü marü name i ngĩxũ taxũte ega aixcũma tũmacax rü ngẽmaãcü namemaẽgu. Rü ngẽma na naxãtexũ i tũmaxãcü rü tama pecadu nixĩ. ³⁷Natürü ngẽxguma wüxi i yatü nüxũ nangẽxmagu i norü pacü rü tama nanaxwaxegu na ngĩxũ naxũtexũ, rü marü name i ngẽma rü ta. Erü naxmẽxwa ingẽxma rü taxucaxma texé tanachixewe na ngĩxũ naxũtexũcax. ³⁸Rü ngẽmawa nüxũ tadau rü ngẽma yatü i naxãcü ngĩxũ ütexũ rü mexũ naxü. Rü ngẽma yatü i tama naxãcü ngĩxũ ütexũ rü yexeraxũ i mexũ naxü. ³⁹Rü wüxi i nge i átecü rü ngĩtemẽxewa ingẽxma i ngẽxguma namaũxgu ya ngĩte. Natürü ngẽxguma nayuxgu ya ngĩte, rü marü name ega to i yatü i ngĩma ngĩxũ ngúchaũxũmaã naxãtegu. Natürü inaxwaxe na wüxi ya yatü ya yaxõcũmaã

naxātexŭ. ⁴⁰Natŭrŭ chauxcax rŭ yexeraācŭ chi itaāē i ngēxguma chi tāŭ chima wena naxātegu. Rŭ ngēma ore rŭ choxrŭtama nixŭ, natŭrŭ nagu charŭxŭnŭ rŭ Tupanaāē i Ūünexŭārŭ ore ta nixŭ.

**Tupananetachicŭnaxāgŭina
naxuaxŭgŭxŭ ga ōnachiga**

8 ¹Ñuxma rŭ tá pemaā nŭxŭ chixu i nachiga i ngēma ōnagŭ i ngēma duŭxŭgŭ i tama Ngechuchuaxŭ yaxōgŭxŭ norŭ tupananetachicŭnaxāgŭina uaxŭgŭxŭ. Rŭ aixcŭma nixŭ i wŭxichigŭ i yixema i meāma nŭxŭ icuāxŭ i ngēmachiga. Natŭrŭ ngēma nŭxŭ na icuāxŭgagu rŭ ñuxguacŭ rŭ yigŭ namaā ítarŭta. Natŭrŭ ngēma na yigŭ ingechaŭxŭ rŭ tŭxŭ narŭngŭxēē na yexeraācŭ meā yaxōgŭchigŭxŭ. ²Rŭ ngēxguma chi texé nagu rŭxŭnŭgu na tacŭxŭ tacuāxŭ, rŭ name nixŭ i nŭxna tacuaxāchi na ngēxguma rŭ ta tama aixcŭma nŭxŭ tacuāxŭ i guxŭma i ngēma cuax i aixcŭma ixŭxŭ. ³Natŭrŭ ngēxguma texé aixcŭma Tupanaxŭ ngechaŭgu, rŭ Tupana rŭ tŭxŭ nacuax ya yŭxema. ⁴Rŭ ngēma na nangōxŭ i ngēma ōnagŭ i tupananetachicŭnaxāgŭina naxuaxŭgŭxŭ i duŭxŭgŭ, rŭ meāma nŭxŭ tacuax na taxuwama namexŭ i ngēma tupananetachicŭnaxāgŭ rŭ tama aixcŭma Tupanaxŭchi nixŭgŭ. Erŭ wŭxixicatama nixŭ ya aixcŭma Tupana ixŭcŭ, rŭ nataxuma ya naŭ. ⁵Rŭ togŭ nŭxŭ ixugŭgŭgu rŭ nangēxma i muxŭchixŭ i tupanagŭ i daxŭguxŭ i naānewa rŭ ñoma i naānewa. ⁶Natŭrŭ yixema nŭxŭ tacuax na nangēxmaxŭ i wŭxitama ya Tupana, rŭ yima nixŭ ya Tanatŭ ixŭcŭ. Rŭ nŭma ya Tanatŭ nixŭ i naxŭāxŭ i guxŭma i tacŭ i ngēxmaxŭ, rŭ naxcax nixŭ i imaxēxŭ i

yixemax. Rŭ ngēxgumariŭŭ ta nangēxma i wŭxitama ya tórŭ Cori ya Ngechuchu ya Cristu. Rŭ yimagagu nixŭ na nangēxmaxŭ i guxŭma, rŭ yimagagu nixŭ i tŭxŭ nangēxmaxŭ i maxŭ. ⁷Natŭrŭ tama guxŭma i yaxōgŭxŭ nŭxŭ nacuax na nangēxmaxŭ i wŭxitama ya Tupana rŭ wŭxitama ya tórŭ Cori. Rŭ ñuxre i nŭmagŭ ga ŭpa rŭ nŭxŭ nayapue na nŭxŭ yaxōgŭāxŭ i ngēma tupananetachicŭnaxāgŭ, rŭ ñuxma rŭ ta tama aixcŭma nŭxŭ nacuaxgŭ i ngēma mexŭ i Tupana nŭxŭ naxwaxexŭ. Rŭ ngēmacax nixŭ i ñuxma i nagu naxŭnŭēxŭ na chixexŭ naxŭgŭxŭ i ngēxguma nangōxgŭāgu i ngēma naxŭnamachi i togŭ i duŭxŭgŭ norŭ tupananetachicŭnaxāgŭina uaxŭgŭxŭ na nŭxŭ namaā yacuaxŭŭgŭxŭcax. ⁸Rŭ yixema nŭxŭ tacuax na tama tacŭ rŭ namachi na ingōxŭgagu yŭxŭ na Tupana tŭxŭ dexŭ. Rŭ tāŭtāma yexera time i napexewa ega nangōxgŭgu i ngēma namachi. Rŭ tāŭtāma yexera tichixe i napexewa ega tama nangōxgŭgu. ⁹Natŭrŭ i pema i nŭxŭ na pecuāxŭ na tama pecadu yŭxŭ na nangōxŭ i ngēma namachi, irŭ pexuāēgŭ erŭ ngŭrŭāchi ngēma na pengōxŭgagu chixexŭgu tá penayixēē i ngēma peeneēgŭ i tauta aixcŭma meā nŭxŭ cuaxgŭxŭ na tacŭ yŭxŭ i Tupana nŭxŭ naxwaxexŭ! ¹⁰Erŭ cuma na meā Tupanaxŭ cucuāxŭ, rŭ ngēxguma chi cunangōxgu i ngēma namachi i ngextá tupananetachicŭnaxāgŭxŭ íyacuaxŭŭgŭxŭwa, rŭ ngŭrŭāchi wŭxi i cueneē i tauta meā Tupanaxŭ cuāxŭ tá cuxŭ nadau. Rŭ ngŭrŭāchi nŭma rŭ tá ta nanangōx i ngēma namachi woo naāēwa nagu naxŭnŭgu na wŭxi i chixexŭ yŭxŭ na

nangóxũ i ngẽma namachi. ¹¹Rũ ngẽmaãcü i cuma na meã Tupanaxũ cucuáxũ, rü tá icuyanatauxẽẽ i ngẽma cueneẽ i Cristu naxcax yuxũ i tauta meã Tupanaxũ cuáxũ. ¹²Rũ ngẽmacax i ngẽxguma chixexũgu cunanguxẽẽxgu i ngẽma cueneẽ i tauta meã Tupanaxũ cuáxũ, rü Cristumaã rü ta chixexũ cuxũ. ¹³Rũ ngẽmacax i ngẽxguma ngẽma namachi i changóxũgagu chixexũgu chananguxẽẽxgu i chaueneẽ, rü narümemã nixĩ i noxtacũma taguma namachi changóx na tama pecadugu chananguxẽẽxũcax i ngẽma chaueneẽ.

**Yíxema Cristu tũxũ muxẽ na nũxũ
tapuracũxũcax, rü tũxna naxũ i
tũmaãrũ natanũ**

9 ¹Rũ pemaã nũxũ chixu rü tórũ Coritama nixĩ ya choxũ yaxucũ rü choxũ mucũ na norũ puracũ chaxũxũcax, rü ngẽmacax taxuũma i duũxũgũmẽxẽwa changẽxma i ñuxmax. Rũ chomatama chauxetũmaã tórũ Cori ya Ngechuchuxũ chadau, rü ngẽma puracũ i nũxũ chaxũxũgagu nixĩ i peyaxögũxũ i pemax. ²Rũ woo togũ i duũxũgũ tama choxũ cuaxgũchaũgu na tórũ Cori choxũ muxũ, natürũ i pema rü meãma nũxũ pecuax na nũma yĩxũ ga choxũ namuxũ. Yerũ chauxũtawa nixĩ ga tórũ Coriaxũ peyaxögũxũ, rü ngẽmawa nũxũ pecuax na aixcũma yĩxũ na nũma choxũ namuxũ. ³⁻⁴Rũ ñaã nixĩ i chorũ dexa i namaã chanangãxũxũ i ngẽma duũxũgũ i chauchiga idexagũxũ:

“¿Exna tama inamexũ na duũxũgũ choxna naxãxũ i chorũ ñna rü chorũ axexũ naxcax i chorũ puracũ? ⁵¿Exna

tama inamexũ ta na wũxi i ngexũ i yaxõxũmaã na chaxãmaxũ na chayagaxũcax ngẽxgumarũ na naxãmaxũ i Pedru, rü naẽneẽgũ ya tórũ Cori, rü ngẽma togũ i yatũgũ i Tupana imugũxũ? ⁶¿Rũ exna pema nagu perũxĩnũgũ rü choma rü Bernabéxicatama i tama namexũ na toxũ perũngũxẽẽgũxũ ngẽma togũ i orearũ uruũgũxũ na perũngũxẽẽgũxũrũ? ⁷¿Tacũ rü duũxũ i churarawa ũxũ i nũgũxũtama naxũtanũxũ i norũ ñna? ¿Rũ tacũ rü duũxũ i orĩx itoxũ i tama namũxũ i norũ o? ¿Rũ tacũ rü duũxũ i carnerugũna dauxũ i tama nagũnenixũ ne ixaxũxũ?” Ngẽma ñncharũgũ nũxũ i ngẽma duũxũgũ i chauchiga idexagũxũ. ⁸iRũ ñuxma rü tãũtama nagu perũxĩnũẽ na chorũ orexicatama yĩxũ i ñaã nũxũ chixuxũ! Erũ Tupanaãrũ ore ga Moĩché ũmatũxũwa rü ta ngẽma ñanagürũ. ⁹Erũ ngẽma ore rü ñanagürũ:

“iRũ ngẽma woca i aruchuarũ
putexewa puracũxũ, rü tãũtama
cunawẽxnagu na tama yima
aruchuwa nachibũxũcax!”

ñanagürũ i ngẽma ore. Rũ nũxũ tacuax na tama wocagũgu naxĩnũxũ ga Tupana ga yexguma yema ñaxgu. ¹⁰Natürũ pemaã nũxũ chixu rü tagu nixĩ ga naxĩnũxũ ga yexguma yema ñaxgu ga Tupana. Rũ tachiga nixĩ ga naxũmatũxũ ga yema ore. Erũ yíxema aruchunecũ ũxe rü yíxema norũ oarũ puxwa puracũxe, rü ngẽxguma tapuracũeyane rü tanaxwaxegũ na ítananguxẽẽgũxũ i ngẽma norũ o i tũxna ũxũ. ¹¹Rũ toma rü wũxi ya nanetũchire ya itatoxũnerũ tixĩgũ ga yexguma pemaã nũxũ tixuxgu

ga Tupanaārū ore. ¿Rū ñuxma rū tama exna i pexcax namexũ na toxna penaxãxũ i tacũ i toxũ taxuxũ? ¹²Rū ngëxguma ngëma togũ i orearũ uruũgũ petanũwa nayauxgũgu i ngëma nũxũ taxuxũ, rū maneca toma rū yexera name nixĩ i petanũwa tanayaxu i ngëma toxũ taxuxũ. Natürũ i toma rū tama ngëmaãcũ tanaxũ. Erũ toma rū guxũ i guxchaxũmaã taporae na tama pexũ tanaguxchaxëëxũcax na Cristuaxũ peyaxögũxũ. ¹³Pema nũxũ pecuax rū guxũma i duũxũgũ i tupauca ya taxũnewa puracũxũ, rū ngëma õna ya yima tupaucawa ngëxmaxũtama nangõxgũ. Rũ ngëma duũxũgũ i tupaucagu Tupanacax naxũnagũ ðaixũ, rū nanade i ñuxre i ngëma namachi norũ ngõxruũ. ¹⁴Rũ ngëxgumarũũ ta ya yĩxema nũxũ ixugũxe i ore i tũxũ maxëëëxũ, rū tórũ Cori nũxũ nixu rū name nixĩ i tũmaārũ puracũcax tanayaxu i tũmaārũ natanũ na ngëmamaã tamaxëëxũcax. ¹⁵Natürũ i choma rū taguma ngëmaãcũ chanaxũ. Rũ ñuxma na pexcax chanaxũmatũxũ i ñaã popera, rū tama tacũ choxna pexãxũcax nixĩ. Erũ ngëma na taguma texëxũtawa tacũcax íchaçaxũ, rū wũxi i chorũ taãë nixĩ. Rũ narũmemaë chierũ nixĩ na chayuxũ naxũpa na texë choxna nayaxuxũ i ñaã taãë i choxũ ngëxmaxũ. ¹⁶Rũ ñuxma na nũxũ chixuxũ i ngëma ore i tũxũ maxëëëxũ, rū taguma ngëmacax chaugũ chicuaxũũ. Erũ woetama ngëma nixĩ i chorũ puracũ ga Tupana choxna ãxũ, rū ngëmacax taxucũrũwama chanangexrũ. Rũ poraãcũ chi chachixexũgu i ngëxguma tãũ chima nũxũ chixuxgu. ¹⁷Rũ

ngëxguma chi chaugagu chitama chanaxũxgu i ngëma puracũ, rū nagu chi charũxĩnũ na choxũ naxãtanũxũ. Natürũ ngëxguma Tupana choxũ muxũãcũma chanaxũxgu, rū chanaxũama erũ woetama ngëma nixĩ i chorũ puracũ ga Tupana choxna ãxũ. ¹⁸¿Rũ ñuxma rū tacũ tá nixĩ i chorũ natanũ naxcax i ngëma puracũ i chaxũxũ? Rũ ðucax, rū chorũ natanũ nixĩ i ngëma taãë i chayaxuxũ i ngëxguma ngetanũãcũma nũxũ chixuxgu i ngëma ore i tũxũ maxëëëxũ. Rũ ngëmaãcũ, rū woo Tupanapexewa name na petanũwa chanayaxuxũ i chorũ natanũ na ngëmamaã chamaxũxũcax, natürũ taguma chanaxũ i ngëma. ¹⁹Rũ woo taxũxemexëwa changëxma i chomax, natürũ guxãmexëwa chaugũ changëxmaxëë, na ngëmaãcũ yexeraãcũ muxũma i duũxũgũ xũxũ charũngũxëëxũcax na Cristuaxũ yaxögũãxũcax. ²⁰Rũ ngëxguma Yudũgũtaniũwa changëxmagu, rū Yudũfurũ chaugũ chixĩxëë na ngëmaãcũ nũxũ charũngũxëëxũcax na Cristuaxũ yaxögũãxũcax. Rũ woo tama yema Moĩché ũmatũxũ ga mugũtũũwa changëxmagu, natürũ chayanguxëëãma i ngëma mugũ na ngëmaãcũ Cristuxũtawa chanagagũxũ i ngëma duũxũgũ i ñuxma rū ta nagu íxũ i ngëma mugũ ga Moĩché ũmatũxũ. ²¹Rũ ngëxguma natanũwa changëxmagu i ngëma duũxũgũ i tama Yudũgũ ixĩgũxũ, rū ngëma duũxũgũrũũ chaugũ chixĩxëë na ngëmaãcũ nũxũ charũngũxëëxũcax na Cristuaxũ yaxögũãxũcax. Natürũ taguma íchanangex i Tupanaārũ mugũ erũ

guxũguma Cristuarũ mugũtũũwa changẽxma. ²²Rũ ngẽxguma natanũwa changẽxmagu i ngẽma duũxũgũ i tama poraãcũ Cristuchigaxũ cuãxgũxũ, rũ choma rũ ta ngẽma duũxũgũrũũ chaugũ chixĩxẽẽ, na ngẽmaãcũ nũxũ charũngũxẽẽxũcax na Cristuaxũ yaxõgũãxũcax. Rũ ngẽmaãcũ guxũma i duũxũgũrũũ chaugũ chixĩxẽẽ, rũ nagũxũraũãcũma naxcax chadau na ngẽmaãcũ dũxwa Tupanaxũtawa chanagagũxũcax i ñuxre i nũmagũ. ²³Rũ ngẽmaãcũ nixĩ i chapuracũxũ na guxũwama nanguxũcax i ngẽma ore i tũxũ maxẽxẽẽxũ. Erũ chanaxwaxe na choma rũ ta choxũ nangẽxmaxũ i ngẽma maxũ i taguma gũxũ, naxrũũ i guxũma i ngẽma duũxũgũ i nũxũ yaxõgũxũ. ²⁴Pema rũ meãma nũxũ pecuax i wũxi i inũca i nawa iñaãchixũ rũ muxũma inaxũãchi, natũrũ wũxixicatama nixĩ i ngẽma nũxĩra ínguxũ rũ nayaxuxũ i norũ ãmare. Rũ name nixĩ i meã na pemaxẽxũ na Tupanaxũtawa penayaxuxũcax i ngẽma perũ ãmare. ²⁵Guxũma i ngẽma duũxũgũ i nũgũ mexẽẽxũ naxcax i wũxi i inũca i nawa iñaãchixũ, rũ meã nũgũna nadau na taxuũma nachixexẽẽxũcax i naxũne. Rũ ngẽmaãcũ nanaxũ na nayauxgũãxũcax i norũ ãmare i paxaãchixũmare ixĩxũ. Natũrũ yixema na yaxõgũxũ rũ yigũna tadaugũ na meã naxũgũxũcax rũ meã imaxẽxũcax na nayauxgũxũcax i tórũ ãmare i taguma gũxũ. ²⁶Rũ ngẽmacax i choma rũ tama ñoma chauechitamare chĩnaxũrũũ chixĩ, rũ tama ñoma ñacu i nũgũ ñaixũ i ngũrũanegumare idagũxũrũũ chixĩ. ²⁷Rũ ngẽmacax meã

chaugũna chadau i chaxunewa na taxuũma i chaxuneãrũ ngũchaũ chaxũxũcax. Erũ tama chanaxwaxe i mexũmaã togũxũ changuxẽẽchirexãcũma choxũ nataxu i chorũ ãmare.

**Nayaxucuxẽgũ na tama nũxũ
yacuaxũũgũxũcax i
tupananetachicũnãxãgũ**

10 ¹Pa Chaueneẽgũx, chanaxwaxe i nũxna pecuaxãchie ga ñacu nũxũ na ngupetũxũ ga yema nuxcũmaũgũxũ ga tórũ oxigũ ga Moĩchéwe rũxĩxũ. Rũ pema nũxũ pecuax rũ yexguma nawe naxĩxgu rũ wũxi ga caixanexũ napexegu nixũ rũ nayadũxũ. Rũ guxũma ga yema duũxũgũ rũ wũxigu Moĩchémaã natũũgu nixĩxũtanũ. Rũ yexgumarũũ ta Moĩchémaã nichoũ nawa ga yema Taxtũ ga Dauchiũxũ. ²Rũ guxũma ga yema duũxũgũ rũ yexguma wũxigu Moĩchémaã yema caixanexũpechitatũũgu yaxĩxũtanũgu rũ yema Taxtũ ga Dauchiũxũwa yachoũgu, rũ yemaãcũ nũgũ nangoxẽẽgũ na Moĩchéweama naxĩxũ. ³Rũ yexgumarũũ ta ga guxũma ga yema duũxũgũ nanangõxgũ ga yema pãũ ga daxũwa rũyixũ. ⁴Rũ guxũma ga yema duũxũgũ nayaxaxgũ ga yema dexá ga Cristu nũxna ãxũ. Yerũ Cristu rũ yema duũxũgũxũ ínixũmũcũ ga yema ínaxĩxũwa, rũ nũxna nanaxã ga yema dexá ga yaxaxgũxũ. ⁵Natũrũ narũmumaẽ ga yema duũxũgũ ga tama Tupanaãrũ ngũchaũ ũgũxũ. Rũ yemacax ga yema duũxũgũ rũ yexma nayue rũ yéma nawogũ ga naxũnegũ ga yema

dauxchitawa ga taxúema íxãpataxũwa. ⁶Rũ guxũma ga yema tórũ oxigũxũ ngupetũxũ, rũ yemaãcũ nũxũ nangupetũ na tórũ cuãxruũ yĩxũcãx, na tama naxrũũ ãcũ rũ chixexũcãxama idaugũxũcãx. ⁷Rũ ngẽmacãx tama name i nũxũ picuãxũũgũ i ãcũ rũ tupanetanetachicũnãxãgũ, yexgumarũũ ga ñuxre ga nũmagũ naxũgũxũrũũ. Erũ Tupanaãrũ ore i ñmatũxũwa rũ tórũ oxigũchigaxũ nixu rũ ñanagũrũ:

“Rũ duũxũgũ ñnarũtogũ na nachibũexũcãx rũ na naxaxegũxũcãx, rũ ngẽmawena rũ inachigũ na íyayũxexũcãx”, ñanagũrũ i ngẽma ore. ⁸Rũ tama name i yixema rũ naĩ i ngemaã itape yexgumarũũ ga ñuxre ga nũmagũ naxũgũxũrũũ. Rũ yemacãx wũxitama ga ngunexũgu rũ nayue ga 23,000. ⁹Rũ tama name i nũxũ taxũ ya tórũ Cori na ñuxãcũ yaxna tamaã naxĩnũxũ yexgumarũũ ga ñuxre ga nũmagũ naxũgũxũrũũ. Rũ yemacãx nixĩ ga yema duũxũgũxũ nangõxcuxũ ga ãxtapegũ rũ nayuexũ. ¹⁰Rũ tama name i chixexũ Tupanamaã pixugũ yema ñuxre ga nuxcũmaũgũxũ ga tórũ oxigũrũũ. Rũ yemacãx ga Tupanaãrũ orearũ ngerũũ ga daxũcũãx rũ nanadai. ¹¹Rũ guxũma ga yema tórũ oxigũxũ ngupetũxũ, rũ ñuxma na yangaicaxũ na nagũxũ i naãne rũ tórũ cuãxruũ nixĩ. Rũ naxũmatũ na ngẽmawa nũxũ icuáxũcãx na ñuxãcũ Tupana naxwãxexũ na imaxẽxũ i yixema i ñomaũcũũ na imaxẽxũ. ¹²Rũ ngẽmacãx ya yĩxema tũgũgu rũxĩnũxẽ na taporaxũ i Tupanapexewa, rũ name nixĩ na meã tũgũna tadauxũ na tama chixexũgu

tanguxũcãx. ¹³Rũ nataxuma i ãcũ rũ ngũchaũ i chixexũ i taxucũrũwama namaã peporaexũ. Rũ Tupana ya aixcũma yanguxẽẽcũ i ngẽma tamaã inaxunetaxũ, rũ tá pexũ narũngũxẽẽ na tama pexũ naporamaẽxũcãx i ngẽma ngũchaũgũ. Erũ ngẽxguma pexcãx ñanguxgu i ngẽma ngũchaũgũ, rũ Tupana tá pexũ naporaexẽẽ na naxchaxwa pixĩgachixũcãx na tama pexũ naporamaẽxũcãx. ¹⁴Rũ ngẽmacãx, Pa Chaueneẽgũ ya Pexũ Changechaũgũxe, irũ nũxna pixĩgachi i guxũma i tupanetanetachicũnãxãgũ na tama nũxũ picuãxũũgũxũcãx! ¹⁵Pemaã nũxũ chixu i ngẽma ore, erũ chauxcãx rũ duũxũgũ i nũxũ cuãxũ pixĩgũ. Rũ pema tátama nagu perũxĩnũẽ i ngẽma pemaã nũxũ chixuxũ. ¹⁶Rũ ngẽxguma õna i ñunexũcãx ingutaquexegũgu, rũ yaxaxgũgu ya yima binu ya ñunecũ rũ moxẽ naxcãx ixãgũgu, rũ ngẽmaãcũ yigũ tangõxẽẽ na Cristu ya taxcãx nagũ ibacũwe rũxĩxũ. Rũ ngẽxguma nangõxgũgu i ngẽma pãũ i ibũcuxũ, rũ ngẽmaãcũ yigũ tangõxẽẽ na Cristu ya taxcãx naxũne ixãcũwe rũxĩxũ. ¹⁷Rũ woo na imuxũ i yixema, natũrũ wũxitama i pãũ tangõxgũ. Rũ ngẽmaãcũ nixĩ i wũxitama ixĩgũxũ erũ wũxiwetama tarũxĩ. ¹⁸Irũ dũcax i ngẽma Yudfugũ i nangõxgũxũ i ngẽma naxũnamachi i Tupanacãx naãaixũ! Rũ ngẽxguma wũxigu nũgũmaã nangõxgũãgu, rũ guxũma i ngẽma nangõxgũxũ rũ ngẽmaãcũ nũgũ nangõxẽẽ na wũxigu Tupanawe naxĩxũ. ¹⁹Rũ ñuxma na ngẽma ñachaxũ, rũ tama chanaxwãxe i nagu perũxĩnũẽ na naxũñnẽxũ i ngẽma namachi i ngẽma

duñxügü i tama yaxōgüxü norü tupanetachicünaxācax ñaixü. Rü tama chanaxwaxe i nagu perüxñnë na ñaciüwa namexü i ngëma norü tupanetachicünaxāgü, erü nangearü maxüāx. ²⁰Natürü pemañ nüxü chixu rü ngëxguma ngëma duñxügü i tama Tupanaxü cuaxgüxü, norü tupanetachicünaxācax nadaiāgu i ñacü rü naxüna, rü tama Tupanacax nixi i nadaiāxü, natürü ngoxogücax nixi i nadaiāxü. Rü tama chanaxwaxe i ngoxogütanüxüxü pegü pixigüxë. ²¹Rü pema na peyaxagüxü ya yima binu ya törü Corixü namañ picuaxüüügü rü taxucürüwama namañ pexāmücü i ngëma duñxügü i Chatanáwe rüixü. Rü pema na törü Coriarü mechawa penangóxü i ngëma ñna i nüxü namañ picuaxüüügüxü rü taxucürüwama ngëma duñxügü i Chatanáwe rüixüñärü mechawa peyachibüe. ²²¿Rü ñuxü ñapegüxü i ñuxmax? ¿Exna penanuxëëchaü ya törü Cori? ¿Exna pexcax rü nüxü tariüporamaëgü i yixemax?

**Cristu rü marü tüxü ñnanguxüxë
nawa i Moichéarü mugü, natürü
taxucürüwama ngëmacax ñuxácümare
taeneëgüpeñewa tamaxë**

²³Pema rü ñaperügügü:

“Marü name na tanaxüxü i ñacü i tanaxwaxegüxü”, ñaperügügü. Rü aixcuma nixi i ngëma, natürü tama tüxü name i guxüma i ngëma ixüxchaüxü. Rü ngëmaäcü Cristu tüxü ñnanguxüxë na naxüxücax i ngëma inaxwaxexü, natürü tama guxüma i ngëma ixüxü tüxü narüngüxë na yexeraäcü meñ

yaxōgüamachigüxücax. ²⁴Rü tama name nixi i tóxrütama mexücax tadaugü, natürü name nixi i togüarü mexücax na idaugüxü. ²⁵Rü marü name i penangōx i nagüxüñäxü i namachi i namañ nataxegüxü. Rü taxucaxma tüxcüü naxcax pexoegaäë rü nüxna peca na ngextá ne naxüxü i ngëma namachi. ²⁶Erü ñoma i nañne rü guxüma i nawa ngëmaxü, rü törü Coriarü nixi. ²⁷Rü ngëxguma chi wüxi i duñxü i tama yaxōxü pexna uxgu na naxütawa peyachibüexücax, rü chi ngëma pexixgu, rü marü name i penangōx i guxüma i ñna i pepexegu yaxüxüchixü. Rü taxucaxma tüxcüü naxcax pexoegaäë rü nüxna peca na ngextá ne naxüxü i ngëma namachi i pemañ nangóxü. ²⁸Natürü ngürüächü wüxie tá pemañ nüxü tixu rü ñatarügü:

“Ñañ namachi rü tupanetachicünaxācax yamaxgüxü i naxünawa ne üxü nixi”, ñatarügü. Rü ngëxguma i pema rü tama name na penangóxü i ngëma namachi na tama chixexügu tüxü penguxëëxücax ya yixema pemañ nüxü ixuxe, rü tama ngëmacax taxoegaäëxücax i tümax. ²⁹Rü tama pechiga nixi i chidexaxü i ngëxguma:

“Na tama taxoegaäëxücax”, ñachagu. Natürü yixema pemañ nüxü ixuxechiga nixi i chidexaxü. Natürü bexmana ngürüächü wüxi i yaxōxü tá cuxna naca rü ñanagürü tá cuxü:

“¿Tüxcüü i togü naxcax oegaäëxügagu choxna cunachuxu na tama chanaxüxü i ñacü i chanaxwaxexü? ³⁰Rü ngëxguma chi Tupanana moxë chaxāxgu naxcax i ngëma ñna i changóxü, ¿rü tüxcüü i

ngẽma õnacax choxũ quixu?” ñanagũrũ.

³¹Dũcax, pemaã nũxũ chixu rũ name nixĩ i guxũma i ngẽma pexũũmaã Tupanaxũ petaxẽẽ. Rũ ngẽxguma tacũ pengõxgũgu rũ ẽxna tacũ pixaxgũgu rũ ẽxna tacũ i to pexũgũgu, rũ name nixĩ i guxũma i ngẽmamaã Tupanaxũ petaxẽẽ.

³²Rũ tama name i penaxũ i tacũ i togũxũ chixexũgu yixẽẽxũ, rũ bai i Yudfũgũxũ, rũ bai i ngẽma duũxũgũ i tama Yudfũgũ ixĩgũxũxũ, rũ bai i ngẽma yaxõgũxũxũ. ³³Rũ choma chanaxwaxe i guxũma i chaxũxũwa na guxũma i togũarũ mexũcax chadauxũ. Rũ tama choxrũtama mexũcax nixĩ i chadauxũ, natũrũ togũarũ mexũcax nixĩ i chadauxũ na nũmagũ rũ ta yaxõgũãxũcax rũ nayauxgũãxũcax i maxũ i taguma gũxũ.

11 ¹Rũ name nixĩ i nagu pexĩ i chaucũma ngẽxgumarũũ i choma na Cristucũmagu chixũxũrũũ.

Ñuxãcũ meã nũgũmaã inacuaxgũ i ngexũgũ i ngutaquẽxegũwa

²Pa Chaueneẽgũx, pemaã chataãẽ erũ guxũguma chaugu perũxĩnũẽ rũ nagu pexĩ ga yema ngxũẽtae ga pexũ changũxẽẽxũ. ³Natũrũ chanaxwaxe i nũxũ pecuax na Cristu rũ wũxichigũ i yatũeru na yĩĩxũ. Rũ yatũxũgũ rũ naxmaxẽru nixĩgũ ngẽxgumarũũ ya Tupana rũ Cristueru na yĩĩxũ. ⁴Rũ ngẽmacax i ngẽxguma wũxi ya yatũ ngutaquẽxewa yumũxẽgu rũ ẽxna Tupanaãrũ orexũ yaxuxgu, rũ tama ñnangaxũchipatexegu, rũ ngẽma rũ wũxi i chixexũ nixĩ i Cristupẽxewa naxũxũ.

⁵Natũrũ ngẽxguma chi wũxi i ngecũ ngutaquẽxewa yumũxẽgu rũ ẽxna

Tupanaãrũ orexũ yaxuxgu, rũ chi tama ngĩgũ natũerugu, rũ ngẽma rũ wũxi i chixexũ nixĩ i ngĩtepẽxewa naxũxũ. Rũ ñoma ngĩgũ yadũeruxũrũũ iyixĩ. ⁶Erũ ngẽxguma chi tama ngĩgũ

natũeruchaũgu, rũ narũmemaẽ nixĩ i noxtacũma ngĩgũ ibaxĩxeru. Natũrũ ngẽxguma chi wũxi i ngĩrũ ãne yixĩgu i ngẽma na ngĩgũ nabaxĩxeruxũ rũ ẽxna ngĩgũ yadũeruxũ, rũ narũmemaẽ nixĩ i ngĩgũ itũeru. ⁷Natũrũ yatũgũ rũ tama name na nũgũ natũerugũxũ. Yerũ ga

Tupana rũ nũgũraũãcũ nanaxũ ga yatũ rũ Tupanachipeta nixĩ. Rũ yima yatũwa nixĩ i nangõxũ na ñuxãcũ namexẽchixũ ya Tupana. Rũ ngẽma ngecũwa nixĩ i nangõxũ na ñuxãcũ namexũ ya yatũ.

⁸Yerũ yexguma noxri Tupana naxũxgu ga yatũ, rũ tama ngecũwa nixĩ ga naxũãxũ. Rũ ngĩma waxi nixĩ ga yatũwa ngĩxũ naxũxũ. ⁹Rũ yatũcax nixĩ ga Tupana ngĩxũ ùxũ ga ngecũ, rũ tama ngecũcax nixĩ ga Tupana naxũxũ ga yatũ. ¹⁰Rũ ngẽmacax name nixĩ i ngĩgũ itũeru na duũxũgũpẽxewa rũ Tupanaãrũ orearũ ngerũũgũ i daxũcũãxgũpẽxewa nangõxũcax na ngĩtemexẽwa nangẽxmaxũ.

¹¹Natũrũ Tupanapẽxewa rũ taxuũma nixĩ ya yatũ ega natauxgu i ngecũ. Rũ ngẽxgumarũũ ta i ngecũ rũ taxuũma iyixĩ ega natauxguma ya yatũ.

¹²Yerũ yexguma noxri Tupana ngĩxũ ùxgu ga ngecũ, rũ yatũwa nixĩ ga ngĩxũ naxũxũ. Rũ ngẽxgumarũũ ta ya yatũ rũ ngecũwa nixĩ i nabuxũ. Natũrũ Tupana nixĩ ya naxũcũ i guxũma i duũxũgũ.

¹³Rũ pematama tá penangugũ rũ ngoxi name na wũxi i ngecũ rũ tama ngĩgũ natũeruãcũma nayumũxẽxũ. ¹⁴Rũ woetama tórũ bucũma nixĩ i nũxũ na

icuáxũ na wüxi i ãne yĩxũ na nügü
 namaɣyaexẽxũ i wüxi i yatixũ.
¹⁵Natürü ngecũcax rü wüxi i mexẽchixũ
 nixĩ na namaɣyaexũ. Erü Tupana rü
 ngĩxna nanaxã i ngĩyae na ngẽmamaã
 ngĩgü natüeruxũcax. ¹⁶Natürü
 ngẽxguma chi texẽ ngẽmachiga tügü
 choxũgagügu, rü name nixĩ i nüxũ
 tacuax na ngẽmatama yĩxũ i tacüma rü
 nacüma i guxũma i yaxõgüxũ i
 guxũnema ya tupaucagüwa.

**Duũxũgü rü chixri namaã inacuaxgü ga
 Coriarü õna i üünexũ**

¹⁷Rü ñuxma i ñãa popera i pexcax
 chaxumatixũwa rü pemaã nüxũ chixu
 rü nangẽxma i wüxi i pecüma i chixexũ
 i tama namaã chataãẽxũ. Erü chauxcax i
 ngẽma perü ngutaquexegü rü pexũ
 nachixexẽẽ, rü tama aixcüma perü
 meruũgü nixĩgü. ¹⁸Erü duũxũgü chomaã
 nüxũ nixugügü rü ngẽxguma tórü
 Coricax pengutaquexegüũxgu rü pegü
 pitoye. Rü ngãxũgu chayaxõ na aixcüma
 yĩxũ i ngẽma nüxũ yaxugüxũ.
¹⁹Choma rü nüxũ chacuax na aixcüma
 woe tátama yĩxũ i pegü pitoyexũ na
 ngẽmawa nüxũ icuáxũcax na texégü
 tiĩxũ ya yĩxema aixcüma Cristuarü
 duũxũgü ixĩgüxe. ²⁰Rü ngẽma pegü na
 pitoyexũgagu nixĩ na tama aixcüma tórü
 Corixũ picuaxũũgüacüma yĩxũ i
 penangõxũ i tórü Coriarü õna i Üünexũ
 i ngẽxguma pengutaquexegüũxgu. ²¹Erü
 ngẽxguma penangõxgu i ngẽma õna i
 Üünexũ rü wüxichigü rü peñuxãẽgü na
 pexira na penayaxuxũcax i ngẽma õna.
 Rü yoxni i ngẽma togü rü ngẽxma
 nataiyae, rü togü rü nayaxxgü ya binu
 ñuxmata nangãxẽ. ²²Exna pengechiũgü

ecax tama ngẽma pechibüexũ rü
 pexaxegüxũ? ¿Tüxcüũ nüxü pexoe i
 ngẽma togü i yaxõgüxũ rü
 penaxãneẽxẽẽ i ngẽma yaxõgüxũ i
 ngearü ngẽmaxũãxgüxũ? ¿Rü tacüxũ tá
 pemaã chixu i ñuxmax? ¿Pexcax rü tá
 pemaã chataãẽxũ? Dücax, pemaã nüxũ
 chixu rü tama pemaã chataãẽ naxcax i
 ngẽma pexügüxũ.

Tórü Coriarü õna i üünexũchiga

²³Yerü tórü Corixũtatwama
 chanayaxu ga yema ngüxẽẽtae ga
 pemaã nüxũ chixuxũ. Rü yexguma
 bexma tórü Cori ga Ngechuchuxũ
 ínaxuaxũgu, rü yematama chütaxũgu rü
 tórü Cori nanayaxu ga wüxi ga pãu.

²⁴Rü Tupanana moxẽ naxcax naxã, rü
 yemawena rü inanabücu, rü ñanagürü:

“Ñãa nixĩ i chaxune i pexcax
 ichaxãxũchiga. iRü penangó i ñãa pãu
 na ngẽmaãcü peãẽwa choxna
 pecuaxãchiexũcax!” ñanagürü. ²⁵Rü
 yexgumarüü ta ga chibüwena rü
 Ngechuchu nanayaxu ga wüxi ga
 pochiyu ga binuchiümaã äacuxũ, rü
 ñanagürü:

“Rü daa binu rü wüxi i cuaxruũ nixĩ
 na ngexwacax Tupana duũxũgümaã
 ixunetaxũ i maxũ i taguma gúxũchiga.
 Rü chaugü ya pexcax ibacümaã nixĩ i
 Tupana pexũ nüxũ cuaxẽẽxũ i
 ngẽmachiga. Rü ngẽxguma ñuxguacü
 daa binu pixaxgügu rü ñuxma choma na
 chanaxüxũrüü tá penaxü na peãẽwa
 choxna pecuaxãchiexũcax”, ñanagürü
 ga Ngechuchu. ²⁶Rü guxũguma i
 ngẽxguma penangõxgu i ñãa pãu rü
 peyaxaxgügu ya daa binu rü ngẽmawa
 tá duũxũgüxũ nüxũ picuaxẽẽ na ñuxãcü

tórü pecaducax nayuxũ ga tórü Cori. Rü ngẽmaãcü tá penaxü ñuxmatáta wena nataegu i nümax.

Ñuxãcü nixĩ i namexũ na nangóxũ i tórü Coriarü ñna i üünexũ

²⁷Rü ngẽxguma chi ngexerũxe ya duũxẽ rü tachixearü maxũãxãcuma tanangõxgu i ñaã pãü rü exna tayaxaũxgu ya daa binu, rü wüxi i chixexũ taxü namaã i naxũne rü nagü ya tórü Cori. ²⁸Rü ngẽmacax naxũpa na tanangóxũ i ngẽma pãü rü na tayaxaxũxü ya yima binu, rü name nixĩ i wüxichigü meã tügü tangugü ngoxi nataxuma i tacü rü chixexũ i tumaãrü maxũwa. ²⁹Erü ngẽxguma chi tanangõxgu rü tayaxaũxgu rü tama meã nagu tarüxĩnügü na tórü Corixũnechiga yĩxũ i ngẽma, rü tügütama poxcuwa taga i ngẽxguma tanangõxgu rü tayaxaũxgu. ³⁰Rü ngẽmacax nixĩ i muxũchixe i petanüwa rü piðaaweexũ rü peturaexũ, rü ñuxre i togü rü marü nayuxũ. ³¹Natürü ngẽxguma chi yigütama ingugü naxũpa na nangóxũ i ngẽma ñna, rü tórü Cori rü taxucax chima tüxũ napoxcue. ³²Natürü ngẽxguma tórü Cori ñoma i tórü maxũwa tüxũ poxcugu, rü ngẽmaãcü tüxũ inayarüwexãchixẽ na tama yixcúra naãneãrü guxgu tüxũ napoxcuxũcax wüxigu namaã i ngẽma duũxũgü i tama yaxõgũxũ. ³³Rü ngẽmacax, Pa Chaueneẽgũx, rü ngẽxguma pengutaquexegü na penangóxũcax i ngẽma ñna i üünexũ, rü name nixĩ i pegü ípenanguxẽ na guxãma wüxigu meã penangóxũcax. ³⁴Rü ngẽxguma chi texé taiyaxgu, rü

name nixĩ i tumaapatawatama tachibü na tama Tupana pexũ poxcuexũcax naxcax na chixexũ pexüexũ i perü ngutaquexegüwa. Rü ngẽma to i guxchaxũgü i pexũ ngẽmaxũ, rü choma tá chanamexẽẽ i ngẽxguma petanüwa chaxũxgu.

Ngẽma nacümagü i Tupanaãẽ i Üünexũ tüxna ãxũchiga

12 ¹Pa Chaueneẽgũx, chanaxwaxe i nüxü pecuax na ñuxãcü yĩxũ i ngẽma nacümagü rü ngẽma cuax i Tupanaãẽ i Üünexũ tüxna ãxũ. Rü ngẽmachiga nixĩ i pemaã nüxü chixuxchaũxũ i ñuxmax. ²Rü pema meãma nüxü pecuax ga yexguma tauta Cristuaxũ peyaxõgügu, rü pegü nüxna pexãgü ga tupanenetachicünaxãgü ga ingeãxũ. ³Rü ngẽmacax i ñuxma rü chanaxwaxe i meã nüxü pecuax rü ngẽxguma Tupanaãẽ i Üünexũ texexũ idexaxẽẽgu, rü taxucürüwama ñatarügü: “Rü wüxi ya chixecü nixĩ ya Ngechuchu”, ñatarügü. Rü ngẽxgumarüü ta, rü taxucürüwama texé ñatarügü:

“Ngechuchu rü tórü Cori nixĩ”, ñatarügü ega tama Tupanaãẽ i Üünexũ tüxü muxgu na ngẽmaãcü tidexaxũcax. ⁴Rü namu nixĩ i nacümagü i duũxũgü yaxuxũ, natürü ngẽma tüxna naxãxũ rü wüxitama nixĩ. Rü nüma nixĩ i Tupanaãẽ i Üünexũ.

⁵Nangẽxma i nagũxũraũxũ i nacüma na ñuxãcü tórü Coricax ipuracüexũ, natürü wüxitama nixĩ ya tórü Cori ya tüxü mucü na nüxü ipuracüexũcax. ⁶Rü Tupanaãrü pora rü nagũxũraũãcü tawa napuracü, natürü wüxitama nixĩ ya Tupana ya guxũma ücü i guxũ i duũxũgüwa. ⁷Rü

Tupana rü wüxichigü i duũxũna nanaxã i cuaxruũ i nawa nüxũ icuáxũ na Naãe i Üünexũ tawa ngẽmaxũ. Rü ngẽmaãcü nanaxü ya Tupana na guxũma i yaxõgũxũ nangũxẽxũcax. ⁸Rü Tupana rü Naãe i Üünexũxũ namu na nũma tüxna naxãxũcax i cuax na tümáxẽ rü nüxũ tacuáxũcax na meã toguãxũ taxucyxẽxũcax. Rü ngẽmatama Naãe i Üünexũ toguãxna nanaxã i cuax na meã nüxũ tacuáxũcax na ñuxãcü meã tangúexẽtaexũ. ⁹Rü tümáxẽ, rü ngẽmatama Naãe i Üünexũ tüxũ nanatauxchaxẽ na meã tayaxõxũcax. Rü togue rü tüxna nanaxã i pora na ngẽmamaã naxcax tayataanexẽxũcax i ngẽma idaaeweexũ. ¹⁰Rü togue rü tüxna nanaxã i pora na tanaxũxũcax i tacü rü mexũ i Tupanaãrũ poramaã üxũ. Rü togue rü tüxna nanaxã i cuax na nüxũ tixuxũcax i Tupanaãrũ ore. Rü togue rü tüxna nanaxã i cuax na nüxũ tacuáxũcax i tacü yĩxũ i ngõxogüarũ ixĩxũ rü tacü yĩxũ i Tupanaãe i Üünexũarũ ixĩxũ. Rü togue rü tüxna nanaxã i cuax na ngẽma tama nüxũ tacuáxũ i nagawa tidexaxũcax. Rü togue rü tüxna nanaxã i cuax na tanangõxẽxũcax na tacüchiga yĩxũ na tidexaxũ ya yixema to i nagawa idexáxe. ¹¹Rü guxũma i ngẽma rü Tupanaãe i Üünexũtama nixĩ i naxũxũ. Rü nũma nixĩ i wüxichigü i duũxũna naxãxũ i ngẽma cuax i nũma nanaxwaxexũ na nüxna naxãxũ.

Guxãma i yixema i yaxõgũxũ rü wüxitama i duũxũrũ tixĩgü

¹²Rü wüxi i naxũne rü woo nüxũ nangẽxmagu i naẽru rü nachaciüügü rü naparagü rü muxũma i to i norü ngẽmaxũgü, natürü wüxitama i naxũne

nixĩ. Rü ngẽxgumarũtama nixĩ i guxũma i Cristuarü duũxũgü na wüxitama i naxũnerũtama yixĩgũxũ. ¹³Tupanaãe i Üünexũ rü wüxitama nixĩ. Rü yexguma fibaiũgu ga yixema, rü wüxitama i naxũnerũ tüxũ nixĩgũxẽ. Rü woo Yudũgü na ixĩgũxũ, rü exna duũxũgü i tama Yudũgü na ixĩgũxũ, rü exna duũxũgü i tacü rü corimexẽwa ngẽxmagũxũ na ixĩgũxũ, rü exna duũxũgü i taxúxemexẽwa ngẽxmagũxũ na ixĩgũxũ, natürü wüxitama i naxũnerũ tüxũ nixĩgũxẽ i nũma i Naãe i Üünexũ. Rü guxãma i yixema rü aixcũma marü tüxna nangu i ngẽma Naãe i Üünexũ. ¹⁴Wüxi i naxũne rü tama nüxĩcatama nixĩ, natürü nüxũ nangẽxma i naẽru rü nachaciüügü rü naparagü. Rü ngẽmaãcü muxũgu nixüye. ¹⁵Rü ngẽxguma chi wüxi ya nacutü ñaxgu:

“Rü ñuxma na tama naxmex chiĩxũ, rü ngẽmacax tama ngẽma naxũnewa changẽxma”, ñaxgu, rü tama ngẽmacax nüxũ narüxo na naxũnearũ yĩxũ. ¹⁶Rü ngẽxguma chi wüxi ya nachinü ñaxgu:

“Rü ñuxma na tama naxëtü chiĩxũ, rü ngẽmacax tama naxũnewa changẽxma”, ñaxgu, rü tama ngẽmacax nüxũ narüxo na naxũnearũ yĩxũ. ¹⁷Erü ngẽxguma chi guxũma i naxũne rü naxëtü yixĩgu, ¿rü tacümaã chi i nüxũ ixĩnüẽxũ? Rü ngẽxguma chi guxũma i naxũne rü naxmachixẽ yixĩgu, ¿rü tacümaã chi i nüxũ iwãxixũ? ¹⁸Natürü Tupana ga naxücü ga taxüne, rü ngexta nũma ínanaxwaxexũgu nanaxü ga taeru rü tachaciüügü rü taparagü i norü guxũma i taxüne. ¹⁹Rü ngẽxguma chi guxũma i taxüne rü taeruxicatama yixĩgu, rü

ɪngẽxũ chi yĩxũ i taxũne ixĩxũ? ²⁰Rũ woo nangẽxma i taeru rũ tachacũügũ rũ taparagũ, natũrũ wũxitama nixĩ i taxũne. ²¹Rũ taxetũ rũ taxucũrũwa taxmẽxũ ñanagũrũ:

“Choma rũ tama chacuxwaxe”, ñanagũrũ. Rũ ngẽxgumarũũ ta i taeru rũ taxucũrũwa tacutũgũxũ ñanagũrũ:

“Choma rũ tama chapexwaxe”, ñanagũrũ. ²²Natũrũ ngẽma yexeraãcü ãũcũmaxũ i taxũnewa, rũ ngẽma nixĩ i yexera nanaxwaxexũ i taxũne. ²³Rũ ngẽma taxũnewa yexeraãcü naxcax ixãnexũ, rũ ngẽma nixĩ i yexera meã ixũxchiruxũ. Rũ ngẽma taxũnewa ngẽmaxũ i tama inaxwaxexũ na nangexchiruxũ, rũ ngẽma nixĩ i yexera meã idũxũxũ. ²⁴Natũrũ tama ngẽmaãcü tanaxũ namaã i ngẽma taxũnewa ngẽmaxũ i guxãxũma iwéxũ. Rũ ngẽmaãcü Tupana nanaxũ i taxũne, na yexeraãcü nũxna idauxũcax i ngẽma yexera naxcax ixãnexũ i taxũnewa. ²⁵Rũ ngẽmaãcü Tupana nanaxũ i taxũne na wũxichigũ i ngẽma taxũnewa ngẽmaxũ rũ nũxna nadauxũcax i natanũxũ, rũ guxũma meã nũgũmaã na napuracũexũcax. ²⁶Rũ ngẽxguma chi wũxi i ngẽma taxũnewa ngẽmaxũ tacũ nũxũ nguxgux, rũ guxũma i ngẽma togũ i natanũxũgũ rũ ta nũxũ nangux. Rũ ngẽxguma chi wũxi i ngẽma taxũnewa ngẽmaxũ tacũmaã taãẽxgu, rũ guxũma i ngẽma togũ i natanũxũgũ rũ ta nataãẽ. ²⁷Rũ ñuxma i pema rũ Cristuxũne pixĩgũ. Rũ wũxichigũ i pema rũ ngẽma naxũnena pexũgũ. ²⁸Rũ ngẽmacax ya Tupana rũ norũ duũxũgũ i yaxõgũxũtanũwa tũxũ naxuneta ya ñuxre na norũ puracũwa tũxũ

namugũxũcax. Rũ tũxũ naxuneta ya toguãx na nũxũ tixuxũcax i norũ ore. Rũ tũxũ naxuneta ya toguãx na duũxũgũxũ tangúexẽẽxũcax i norũ ore, rũ toguãx na tanaxũxũcax i mexũgũ i taxũgũ i Tupanaãrũ poramaã iuxũ. Rũ tũxũ naxuneta ya toguãx na tana-meẽxẽẽxũcax i idaaeweexũ, rũ toguãx na togũxũ tarũngũxẽẽgũxũcax, rũ toguãx na yaxõgũxũãrũ ãẽxgacũgũ na tixĩgũxũcax. Rũ tũxũ naxuneta ya toguãx na ngẽma tũma tama nũxũ tacuáxũ i nagawa na tidexagũxũcax. ²⁹Rũ tama guxãma rũ Tupana tũxũ imugũxe tixĩgũ, rũ tama guxãma Tupanaãrũ orearũ uruũ tixĩgũ. Rũ tama guxãma norũ orewa nguxẽẽtaegũxe tixĩgũ, rũ tama guxãma nũxũ tacuax na tanaxũxũ i mexũgũ i taxũgũ i Tupanaãrũ poramaã iuxũ. ³⁰Rũ tama guxãma nũxũ tacuax na tanameẽxẽẽxũ i duũxũgũ i idaaeweexũ. Rũ tama guxãma nũxũ tacuax na nawa tidexagũxũ i wũxi i naga i tama nũxũ tacuáxũ. Rũ tama guxãma nũxũ tacuax na tanangoxẽẽxũ na tacũchiga yadexaxũ i ngẽma duũxũgũ i tama nũxũ nacuáxũ i nagawa idexaxũ. ³¹iRũ naxcax pedax na Tupanaxũtawa penayaxuxũcax i ngẽma cuax i rũmemaẽxũ!

Yigũ na ingechaũgũxũchiga

Natũrũ i ñuxma rũ tá pexũ changúexẽẽ i tacũ nixĩ i guxũma i ngẽma pemaã nũxũ chixuxũãrũ yexera rũmemaẽxũ.

13 ¹Rũ woo ngẽma choma tama nũxũ chacuáxũ i nagawa chideaxgu, rũ woo Tupanaãrũ orearũ ngeruũgũ i daxũcũãxgawa chideaxgu,

natürü wüxi i tacü i āgaxürüūmare chixi ega tama chomüciūxü changechaūgu. ²Rü woo nüxü chachuaxgu na meā duūxūgümaā nüxü chixuxü i Tupanaärü ore, rü woo nüxü chachuaxgu i guxüma i tacü i ēxūguxü i Tupanachiga, rü woo chomaā nanguūxgu na ngēma chorü ōmaā chayaxīgachixēēxü ya māxpūnegü, natürü taxuwama chame ega tama chomüciūxü changechaūgu. ³Rü woo ngēma duūxūgü i ngearü dīēruāxgüxüxü chayanuxgu i guxüma i tacü i choxü ngēmaxü, rü woo Tupanaärü oreçax chaugü ichaxāxgu na üxüwa choxü yagugüxüçax, rü taxuwama choxü name i ngēma ega tama chomüciūxü changechaūgu. ⁴Rü yixema tümamüciūxü ngechaūxē, rü yaxna namaā taxinü, rü namaā tamecüma. Rü tama tixāūxāchiwaxe, rü tama tügü ítarüta, rü tama tügü ticuaxüü. ⁵Rü yixema tümamüciūxü ngechaūxē, rü tama taguxchigawaxe, rü tama tügüguxicatama tarüxinü, rü tama tanuxwaxe, rü tama nagu tarüxinüēcha ega texé chixexü tümamaā üxgu. ⁶Rü tama namaā tataāē i chixexügü, natürü namaā tataāē i ngēma ore i aixcüma ixixü. ⁷Rü yixema aixcüma tümamüciūxü ngechaūxē, rü yaxna namaā taxinü, rü guxüguma nüxü tayaxō, rü guxüguma mexügu namaā tarüxinü, rü taguma naxchi taxai woo tacü tümamaā naxüxgu i tümamüci. ⁸Rü ngēma yigü na ingechaūxü rü tagutáma inayacuax. Natürü ngēma na nüxü ixuxü i Tupanaärü ore rü wüxi i ngunexügu tá inayacuax. Rü ngēma tama nüxü icuáxü i nagawa na idexaxü, rü tá ta inayacuax. Rü ngēma ñuxma nüxü icuáxü rü wüxi i ngunexügu rü marü taxuwatáma tüxü name. ⁹Erü ngēma tórü cuax i ñuxma tüxü ngēmaxü,

rü Tupanapexewa rü naxíra. Rü ngēxgumarüü ta i ngēma norü orexü na ixuxü, rü wüxi i íramarexütama nixí. ¹⁰Rü guxüma i ngēma rü tá inayarüxo i ngēxguma Tupanapexewa ingugügu rü nüma guxüxüma tüxü nacuaxēēgu. ¹¹Yexguma chabuxgu ga chomax, rü wüxi ga buxürüü chidexa, rü buxü nagu rüxinüxügu charüxinü, rü tama meā chauāēxü chachuax. Natürü yexguma marü chayaxgu, rü nüxü charüxo ga guxüma ga yema chorü bucüma. ¹²Rü ngēma ñuxma nüxü idauxü i Tupanachiga, rü ñoma wüxi ya worua ya üxachametüxüwa yigü idauxürüü nixí na taxçax naxēxü. Natürü yixcüra rü tá aixcüma meā nüxüxüchi tadau ya Tupana. Rü ñuxma rü írariwatama nüxü chachuax i Tupanachiga. Natürü wüxi i ngunexügu rü tá meā nüxü chachuax i guxüma i nachiga, ngēma na Tupana meāma choxü cuáxürüü. ¹³Rü ñuxma rü nangēxma i tomaēxpüx i nacümagü i guxügucax ixixü. Rü ngēma nixí:

1 Rü Tupanaāxü tayaxögü

2 Rü nüxü ítananguxēē na nataeguxü ya Cristu

3 Rü nüxü tacuax na tamüciūxü ingechaūxü.

Natürü ngēma tomaēxpüxtanüwa rü ngēma guxüärü yexera ixixü, rü ngēma nixí na tamüciūxü ingechaūxü.

Ngēma tama nüxü icuáxü i nagawa na idexaxüchiga

14 ¹iRü naxçax pedax na pemüciūgüxü pengechaūxü! Rü ngēxgumarüü ta name nixí i naxçax ípeca na Tupana pexna naxāxüçax i ngēma togü i nacümagü i Naāē i

Üünexũwa ne ãxũ. iRũ ngẽma nacũma i yexeraãcũ naxcax ípeçaxũ nixĩ na meãma nũxũ pixuxũ i norũ ore!

²Yíxema duĩxẽ ya tama nũxũ tacuáxũ i nagawa idexaxe, rũ Tupanamaã nixĩ i tidexaxũ rũ tama i duĩxũgũmaã, erũ taxúema nũxũ tacuax na ñuxũ ñaxũchiga yĩxũ. Rũ Tupanaãe i Üünexũ nixĩ i tũxũ idexaxẽẽxũ, natürũ ngẽma ore i nũxũ tixuxũ rũ ẽxũguxũ nixĩ.

³Natürũ yíxema nũxũ ixuxe i Tupanaãrũ ore rũ ngẽmaãcũ nũxũ tarũngũxẽe i duĩxũgũ na yexeraãcũ meã yaxõgũãxũcax rũ nũxũ nangúchaũxũcax i ngẽma ore rũ naporaexũcax i ngẽxguma guxchaxũ nũxũ ìpetũgu. ⁴Rũ yíxema duĩxẽ ya tama nũxũ tacuáxũ i nagawa idexaxe, rũ tũmacaxtama nixĩ i ngẽma, na yexeraãcũ meã Tupanaãxũ tayaxõxũcax. Natürũ yíxema nũxũ ixuxe i Tupanaãrũ ore, rũ nũxũ tixu na yexeraãcũ Tupanaãxũ yaxõgũãxũcax i guxũma i yaxõgũxũ. ⁵Choma chierũ chanaxwaxe na guxãma i pema rũ ngẽma tama nũxũ pecuáxũ i nagawa na pidexagũxũ. Natürũ yexeraãcũ chanaxwaxe na duĩxũgũmaã nũxũ pixuxũ i Tupanaãrũ ore. Erũ ngẽma to i nagawa na pidexagũxũãrũ yexera narũmemaẽ na togũmaã nũxũ pixuxũ i Tupanaãrũ ore. Natürũ ngẽma to i nagawa na idexaxũ, rũ name ega ngẽma yaxõgũxũmaã nũxũ ixuxgu na tacũchiga yĩxũ i ngẽma dexta, na nũmagũ rũ ta yexeraãcũ meã Tupanaãxũ yaxõgũãxũcax. ⁶Rũ ngẽmacax, Pa Chaueneẽgũx, rũ ngẽxguma chi pexũtawa chaxũxgu, rũ chi to i nagawa chideaxgu, ¿rũ tacũwa chi pexũ namexũ i ngẽma? Natürũ ngẽxguma chi pemaã

nũxũ chixuxgu i ngẽma Tupana tũxũ nũxũ cuaxẽẽxũ, rũ exna ngẽma chomatama nũxũ chacuáxũ na aixcũma yĩxũ, rũ exna ngẽma ẽxũguxũ i ñuxma Tupana tũxũ nũxũ cuaxẽẽxũ, rũ exna tacũ rũ to i nguxẽẽtae i Tupanachiga, rũ ngẽma waxi nixĩ i pexũ mexũ. ⁷iRũ dũcax i ngẽma paxetaruũ i quena rũ exna arpa! Rũ ngẽxguma tãũ chima texẽ meã napaxũxgu, rũ tãũ chima nũxũ tacuax na tacũgu tanapaxũxũ. ⁸Rũ ngẽma churaragũ, rũ ngẽxguma norũ uwanũgũmaã nũgũ nadaixchaũgu, ¿rũ ñuxãcũ tá nũgũ namexẽe na nũgũ nadaixũcax ega tama meã nangógagu ya yima corneta ya dajxcax naxcax çaxũne? ⁹Rũ ngẽxgumarũũ ta pemaã nangupetũ. Rũ ngẽxguma chi perũ conũmaã nũxũ pixuxgu i dexta i taxúema nũxũ cuáxũ, ¿rũ ñuxãcũ tá nũxũ tacuax na ñuxũ ñaxũchiga yĩxũ i ngẽma nũxũ pixuxũ? Rũ ñoma ngũrüanewa pidexagũxũrũũ tá pixĩgũ. ¹⁰Rũ aixcũma nixĩ i namuxũ i nagagũ i ñoma i naãnewa. Rũ guxũma i ngẽma nagagũ rũ name naxcax i ngẽma duĩxũgũ i nawa idexagũxũ. ¹¹Natürũ ngẽxguma chi tama nũxũ chacuaxgu i ngẽma naga i to i duĩxũ chomaã nawa idexaxũ, rũ ngẽma duĩxũcax rũ ñoma to i nachĩũãneçũãxũrũ chixĩ, rũ chauxcax rũ ñoma to i nachĩũãneçũãx i duĩxũrũũ nixĩ i nũmax. ¹²Choma nũxũ chacuax rũ pema rũ pexũ nangúchaũ na pexũ nangẽxmaxũ i ngẽma nacũmagũ i Tupanaãe i Üünexũ tũxna ãxũ. Natürũ name nixĩ i naxcax pedau na guxũãrũ yexera pexna naxããxũ i ngẽma nacũmagũ i namaã nũxũ perũngũxẽẽxũ i guxũma i yaxõgũxũ na yexeraãcũ meã

Tupanaãxú yaxôgüãxûçax. ¹³Rü ngẽmacax yíxema duũxẽ ya taxúema nüxũ cuáxũ i nagawa idexaxe, rü name nixĩ i Tupanana naxçax taca na tũxna naxããxûçax i cuax na togümaã nüxũ tixuxûçax na ñuxũ ñaxûchiga yĩxũ i ngẽma nüxũ tixuxũ. ¹⁴Rü ngẽxguma chi taxúema nüxũ cuáxũ i nagawa chayumüxẽgu, rü chauãẽ nixĩ i ngẽma yumüxẽxũ. Natürü chomatama rü taxuũma chacuax na tacûchiga yĩxũ i ngẽma. ¹⁵¿Rü tacü tá chaxü i ñuxmax? Rü marü name nixĩ ega taxúema nüxũ cuáxũ i nagawa chayumüxẽgu, natürü chanaxwaxe i guxãma nüxũ cuáxũ i nagawa rü ta chayumüxẽ. Rü marü name nixĩ ega taxúema nüxũ cuáxũ i nagawa chawiyaegu, natürü chanaxwaxe i guxãma nüxũ cuáxũ i nagawa rü ta chawiyae. ¹⁶Erü ngẽxguma chi taxúema nüxũ cuáxũ i nagawa Tupanaxũ quicuaxũũgu, rü yíxema duũxẽgü ya ngẽma irüxĩnüxẽ, rü taxucürüwa cumaã wüxigu Tupanaxũ ticuaxũũgü, erü tama nüxũ tacuax na ñuxũ ñaxûchiga yĩxũ i ngẽma nüxũ quixuxũ. ¹⁷Rü woo ngẽma curü yumüxẽ rü namexêchixgu, natürü yíxema duũxẽgü ya ngẽma irüxĩnüxẽ rü taxuũma i mexũ nawa tayaxu ega to i nagawa quideaxgu. ¹⁸Tupanana moxẽ chaxã, erü perü yexera taxúema nüxũ cuáxũ i nagawa chidexa. ¹⁹Natürü woo muxũma i ore i taxúema nüxũ cuáxũ i nagawa na chidexaxũ, natürü ngẽma yaxôgüxũärü ngutaquexegüwa rü chauxçax rü narümemae chi nixĩ ega woo noxre i ore i meãma nüxũ icuáxũwa namaã nüxũ chixuxgu i Tupanaärü ore na ngẽmaãcü ngẽmamaã

meã chanangüxẽxũçax. ²⁰Pa Chaueneëgüx, tama name nixĩ i buxũgürüü pixigü i ngẽma nagu perüxĩnüxũwa. Rü name nixĩ i wüxi i buxũ i ngexwacax íraxürüü tama chixexũ pexü, natürü ngẽma nagu perüxĩnüxũwa rü penaxwaxe i duũxũ i marü yaxürüü nagu perüxĩnü. ²¹Tupanaärü ore ga nuxcümaũxũ ga norü orearü uruũ ümatixũ rü ñanagürü: “Rü nuã tá chanamugü i to i nachiũanecũãx i duũxũgü na to i nagawa yadexagüxûçax namaã i ñaã Yudfugü i tama yaxôgüxũ. Natürü woo ngẽmaãcü chanaxüxgu, rü tãütãma chauga naxĩnüẽ i ngẽma Yudfugü i tama irüxĩnüẽchaũxũ”, ñanagürü ga Tupana. ²²Rü ngẽmacax ngẽma na taxúema nüxũ cuáxũ i nagawa idexaxũ, rü wüxi i cuaxruũ nixĩ naxçax i ngẽma duũxũgü i tama irüxĩnüẽchaũxũ. Rü tama duũxũgü i marü yaxôgüxûçax nixĩ i ngẽma. Natürü ngẽma Tupanaärü orexũ na ixuxũ, rü duũxũgü i marü yaxôgüxûçax nixĩ na yexeraãcü meã Tupanaãxú yaxôgüãxûçax. Rü tama duũxũgü i tama irüxĩnüẽchaũxûçax nixĩ i ngẽma. ²³Rü ngẽxguma chi pema i yaxôgüxe pengutaquexegügu, rü guxã chima to i nagawa pidexagügu, ¿rü ñuxũ ñaxũ tá ega petanügu naxücuxgu i wüxi i duũxũ i ngẽma iyarüxĩnüxũ rü exna wüxi i duũxũ i tauta yaxôxũ? ¿Taux exna i nagu tá naxĩnüxũ na pexãũãëgüxũ i pemax? ²⁴Natürü ngẽxguma chi guxãma i pema nüxũ pixuxgu i Tupanaärü ore, rü chi petanügu naxücuxgu i wüxi i

duūxũ i tama yaxōxũ rü ɛxna wüxi i duūxũ i ngēma iyarūxīnūxũ, rü tá nüxũ naxīnū i ngēma Tupanaārū ore i nüxũ pixuxũ. Rü ngēmaācū tá nüxũ nacuax na nūma rü wüxi i pecaduáxũ na yīxũ. Rü nügūgu tátama ínārūxīnū i ngēxguma nüxũ naxīnūgu i ngēma nüxũ pixugūexũ. ²⁵Rü ngēma chixexũ i nüxīcatama nüxũ nacuáxũ rü tá naxçax ínicuax. Rü nūma rü ngēxma tá nacaxápxũ, rü tá Tupanaxũ nicuaxũ. Rü tá nüxũ nixu na aixcūma Tupana petanūwa nangēxmaxũ.

**Guxūma i tacū i ngutaquexewa pexūxũ,
rü name nixī i meā peāēta
ipexūācūma penaxū**

²⁶Dūcax, Pa Chaueneēgūx, ñuxma tá pemaā nüxũ chixu na ñuxācū tá penaxūxũ ega ngēxguma pengutaquexegūgu. Rü ñuxre i pema rü marū name na Tupanaārū wiyaegu pewiyaegūxũ, rü togue rü tanguxēētaegūxũ, rü togue rü nüxũ tixuxũ i ngēma ore i Tupana tūxũ nüxũ cuaxēēxũ, rü togue rü nawa tidexagūxũ i naga i tama nüxũ tacuaxgūxũ, rü togue rü tanangoxēēgūxũ i ngēma dexta i to i nagawa nüxũ yaxugūxũ. Natürü guxūma i ngēma rü tanaxwaxe i yaxōgūxũārū ngūxēēçax na yīxũ, na yexeraācū yaxōgūāxũçax rü meā Tupanaçax namaxēxũçax. ²⁷Rü ngēxguma to i naga i pema tama nüxũ pecuáxūwa pidexagūgu, rü name nixī i taxre rü ɛxna tomaēxpūxīcatama tidexagū. Rü tanaxwaxe i wüxiexira tidexa i noxri rü yixcama ya togue. Rü ngēxguma chi texé to i nagawa ideaxgu, rü name nixī na tangēxmaxũ ya wüxie

ya nüxũ ixuchigūxe na tacūchiga yīxũ i ngēma ore i to i nagawa nüxũ yaxuxũ. ²⁸Natürü ngēxguma chi tatauxgu na texé nüxũ ixuchigūxũ na tacūchiga yīxũ i ngēma ore i to i nagawa nüxũ yaxuxũ, rü narūmemaē nixī na noxtacūma tama to i nagawa pidexagū i perū ngutaquexewa. Rü narūmemaē i wüxichigū tūxica Tupanamaāxīcatama bexma tidexagū. ²⁹Rü ngēxgumarūũ ta ngēxguma pengutaquexegūgu, rü name nixī i taxre rü ɛxna tomaēxpūxīcatama nüxũ tixu i Tupanaārū ore. Rü ngēma togū i ngutaquexetanūxũ rü name nixī na meā nangugūgūāxũ i ngēma ore. ³⁰Natürü ngēxguma chi íyadexayane i wüxi i duūxũ, rü Tupana tūmamaā ideaxgu ya togue ya ngēma rütuxe, rü name nixī na iyanachianexũ i ngēma nüxīra idexaxũ na tidexaxūçax ya yīxema duūxē ya Tupana tūmamaā idexaxe. ³¹Rü ngēmaācū guxāma i pema na Tupana pemaā idexaxũ, rü name nixī i wüxichigū ípenanguxēē na pewa nanguxũ na pidexagūxũ i Tupanaārū ore. Rü ngēmaācū i ngēma togū i ngutaquexetanūxũgū rü tá Tupanachiga meā nangúe rü tá nataāēgū. ³²Rü ngēmaācū tanaxwaxe i meāma tūmaāēmaā itacuax ya wüxichigū ya yīxema Tupanaārū orexũ ixuxe. ³³⁻³⁴Erü perū ngutaquexegūwa rü Tupana nanaxwaxe na meā penaxūxũ i guxūma, rü tama nanaxwaxe na ngēma pexāūgatanūxũ rü pegū ípetüexēēxũ. Rü guxūma i togū i yaxōgūxũārū ngutaquexegūwa rü marū nüxũ nayapue na tama yadexagūxũ i ngexūgū. Rü name nixī i pema rü ta ngēmaācū penaxū, erü nachuxu na yadexagūxũ i

ngexũgũ i ngutaquexegũwa. Rũ name nixĩ na yatũgũga naxĩnũẽxũ i ngexũgũ, ngẽma Tupanaãrũ ore tũxũ muxũrũũ. ³⁵Rũ ngẽxguma chi tacũxũ nacuáxchaũgu i wũxi i ngexũ, rũ name nixĩ i nachiũwatama natena naca i nachiga i ngẽma. Erũ wũxi i ãne nixĩ ega ngutaquexewa yadeaxgu i wũxi i ngexũ. ³⁶Pa Corĩtiucũĩãxgũx, name nixĩ na nũxna pecuáxachiexũ na tama pewaxira ne naxũxũ i Tupanaãrũ ore. Rũ tama pexicatama nixĩ i penayauxgũxũ i ngẽma. ³⁷Rũ ngẽxguma chi texé tũgũgu rũxĩnũgu na Tupanaãrũ orearũ uruũ tiĩxũ rũ ẽxna tũgũgu tarũxĩnũgu na Tupanaãẽ i Ûunexũ tũxna naxãxũ i tacũ rũ cuax, rũ name nixĩ i nũxna tacuáxachi na tórũ Coriarũ ore yĩxũ i ñaã ore i pexcax chaxũmatũxũ. ³⁸Natũrũ ngẽxguma chi texé tama nũxũ cuáxchaũgu i ngẽma pemaã nũxũ chixuxũ, rũ name nixĩ i tama tũxũ pecuáxchaũ. ³⁹iRũ ngẽmacax, Pa Chaueneẽgũx, rũ Tupanana naxcax peca i cuax na meãma nũxũ pixuxũcax i norũ ore! iRũ tama penachuxu na to i nagawa yadexagũxũ i duũxũgũ! ⁴⁰Rũ peru ngutaquexegũwa, rũ name nixĩ na meã penaxũxũ i guxũma. Rũ tama name i ngẽma pexãũgatanũ rũ pegũ ípetũexẽẽ.

Cristu na yuwa írudaxũchiga

15 ¹Rũ ñuxmax, Pa Chaueneẽgũx, rũ chanaxwaxe i nũxna pecuáxachie i ngẽma Tupanaãrũ ore i tũxũ maxẽxẽxũ ga pemaã nũxũ chixuxũ. Rũ yematama ore nixĩ ga pema peyauxgũxũ. Rũ ñuxma rũ ngẽmatama oregagu nixĩ i meã peyaxõgũxũ. ²Rũ

ngẽma oregagu nixĩ i pexũ nangẽxmaxũ i maxũ i taguma gúxũ, ega aixcũma guxũguma peyaxõgũamagu. Natũrũ ngẽxguma tama guxũguma peyaxõgũgu, rũ natũcaxmamare nixĩ i ngẽma peru õ. ³Rũ noxri pexũ changũexẽẽ ga yema nguxẽẽtae ga chomatama togũ ga chomũcũgũxũtawa chayaxuxũ. Rũ pexũ changũexẽẽ na Cristu rũ tórũ pecaduacax nayuxũ, ngẽma Tupanaãrũ ore i ñmatũxũwa nũxũ ixuxũrũũ. ⁴Rũ yexgumarũũ ta pexũ changũexẽẽ na ñuxãcũ inatãxgũãxũ, rũ ñuxãcũ norũ tomaẽxpũx ga ngunexũgu rũ wena na namaxũxũ, ngẽma Tupanaãrũ ore i ñmatũxũ nũxũ ixuxũrũũ. ⁵Rũ yexgumarũũ ta pexũ changũexẽẽ ga ñuxãcũ Pedrucax na nangõxũ ga Cristu, rũ ñuxãcũ yixcũra rũ norũ ngũexũgũ ga yamugũxũcax na nangõxũ. ⁶Rũ yemawena ga Cristu rũ noxtacũma 500 arũ yexera ga yaxõgũxũcax nangõx. Rũ muxũma i ngẽma duũxũgũ rũ ñuxma rũ ta namaxẽ, natũrũ nũmaxũ rũ marũ nayue. ⁷Rũ yemawena rũ Chaũtiágucax nangõx, rũ yixcama guxũma ga yema togũ ga ngũexũgũ ga yamugũxũcax nangõx. ⁸Rũ dũxwa chowa inayacuax ga chauxcax rũ ta na nangõxũ, woo ngũrũãchimarẽ nixĩ ga yema, ngẽxgumarũũ i wũxi i buxũ i tautama norũ ngunexũwa nanguyane buxũrũũ. ⁹Rũ choma rũ guxũma i ngẽma togũ i Tupana imugũxũtũũwa chaxũ. Rũ tãũ chima name na Tupana imuxũmaã choxũ naxugũxũ i duũxũgũ, yerũ nawe chingẽchigũ ga Tupanaãrũ duũxũgũ rũ poraãcũ chixexũ namaã chaxũ. ¹⁰Natũrũ ga Tupana rũ chomaã namecũma, rũ ngẽmacax i ñuxma rũ choxũ pedau na

tacü chiĩxũ rü ñuxăcü na chiĩxũ. Rü yema chomaã na namecũmaxũ rü tama natũcaxma nixĩ. Yerü choma rü guxũ ga togũ ga yamugũxũârũ yexera chanaxũ ga Tupanaârũ puracũ. Natürũ tama chomatama nixĩ ga chanaxũxũ ga yema puracũ, natürũ Tupana ga chomaã mecũmacũ rü chomaã puracũcũ nixĩ ga naxũcũ ga yema puracũ na nüxũ chixuxũcax ga norũ ore. ¹¹Natürũ i ñuxma rü nüétama nixĩ ega woo choma chixĩgu rü erna togũ yixĩgu ga pemaã nüxũ ixuxũ ga yema ore. Yerü yema ore ga pemaã nüxũ tixuxũ, rü Tupanaârũ ore i tüxũ maxẽxẽxũ nixĩ, rü yema nixĩ ga pixõgũxũ.

**Ñuxăcü wena tá namaxẽ i
duũxũgũ i yuexũ**

¹²Marũ pemaã nüxũ tixu na Cristu rü yuwa ínadxũ. ¿Rü tüxcũũ ñuxre i pema rü ñaperũgũgũ:

“Yuexũ rü tagutáma wena namaxẽ”, ñaperũgũgũ? ¹³Rü ngẽxguma chi ngẽma yuexũ rü tagu chima wena namaxẽgu rü ga Cristu rü chi ta tãũ chima wena namaxũ. ¹⁴Rü yexguma chi Cristu tama wena maũxgu, rü ngẽma ore i nüxũ tixuxũ i nachiga rü taxuwa chima name, rü natũcaxmamare chi nixĩ i perũ õ.

¹⁵Rü ngẽxguma chi ngẽmaăcü yixĩgu, rü toma rü Tupanaârũ orearũ uruũgũ i dorataaxgũxũ chi tixĩgũ. Erũ nüxũ tixu na Tupana Cristuxũ wena maxẽxũ. Rü ngẽxguma chi tama aixcũma yixĩgu na wena namaxẽxũ i yuexũ, rü chi wũxi i doramare nixĩ na Tupana Cristuxũ wena maxẽxũ. ¹⁶Rü ngẽxguma chi ngẽma yuexũ rü tagu chima wena namaxẽgu, rü ga Cristu rü chi ta tãũ chima wena

namaxũ. ¹⁷Rü yexguma chi Cristu tama wena maũxgu, rü natũcaxmamare chi nixĩ i peyaxõgũxũ, rü chi ñuxma rü ta perũ pecadugagu ipeyarũtauxe. ¹⁸Rü chi ngẽmaăcü yixĩgu rü ngẽma duũxũgũ i Cristuaxũ yaxõgũxũ i marũ yuexũ, rü chi ta tãũ chima nüxũ nangẽxma i maxũ i taguma gũxũ. ¹⁹Rü ngẽxguma chi ñoma i maxũcaxicatama yixĩgu na Cristuaxũ yaxõgũxũ, rü chi guxũ i togũ i duũxũgũarũ yexera tangechaũtũmũũgũ. ²⁰Natürũ aixcũmaxũchi nixĩ ga Cristu ga yuwa na ínadxũ. Rü natanũwa i guxũma i ngẽma yuexũ i yixcũra tá frĩdagũxũ, rü Cristu nixĩ ga namaã inaxũgũcũ na ínadxũ, yerũ nüma nixĩ ga nüxĩra wena namaxũxũ. ²¹Rü yexgumarũũ wũxi ga yatũgagu na nayuexũ ga duũxũgũ, rü ngẽxgumarũũ tá ta nixĩ na wũxi i yatũgagu wena namaxẽxũ i ngẽma marũ yuexũ. ²²Rü ngẽxgumarũũ Adãũgagu guxãma na yuexũ, rü ngẽxgumarũũ tá ta nixĩ na Cristugagu namaxẽxũ i guxũma i duũxũgũ i nüxũ yaxõgũxũ. ²³Natürũ wũxichigũ tá tũmawa nangu na wena tamaxũxũ. Rü Cristu nixĩ ga nüxĩra maxũcũ. Rü ngẽxguma wena núma naxũxgu i nũmax, rü ngẽxguma tá nixĩ i wena namaxẽxũ i ngẽma duũxũgũ i noxrũ ixĩgũxũ. ²⁴Rü ngẽmawena tá nixĩ i nagũxũ i naãne. Rü ngẽxguma tá nixĩ ya Cristu i nüxũ naporamaẽxũ i guxũma i norũ uwanũgũ. Rü ngẽxguma tá nixĩ i Nanatũ ya Tupanana naxããxũ i guxũma na nüma namaã inacuáxũcax. ²⁵Erũ nüma ya Cristu rü ãẽxgacũ tá nixĩ ñuxmatáta nüxũ naporamaẽ i guxũma i norũ uwanũgũ. ²⁶Rü ngẽma nawa iyacuáxũ i norũ uwanũ i tá nüxũ

naporamaxēxū, rü yu nixī. ²⁷Yerü Tupana rü marü Cristumexēwa nanayexmagüxēē ga guxūma. Natürü woo Tupanaärü ore nüxū ixuxgu na Cristumexēwa nangēxmagüxū i guxūma, natürü nūmatama ya Tupana rü tama Cristumexēwa nangēxma. Yerü nūma ga Tupana nixī ga Cristumexēwa nayexmagüxēēxū ga guxūma. ²⁸Rü ngēxguma guxūma Cristumexēwa ngēxmagügu, rü ñuxūchi nūmatama ya Cristu ya Tupana Nane rü tá Nanatümexēwa nügü nangēxmaxēē. Yerü nūma ga Tupana nixī ga noxri Cristumexēwa nayexmagüxēēxū ga guxūma. Rü ngēmaācü ya Tupana rü guxūärü āēxgacü tá nixī. ²⁹Rü nangēxma i ñuxre i duūxūgü i petanüwa i Tupanaégagu yuexūchicüü íbaiūxū. ¿Rü tūxcüü ngēma naxügu? Rü ngēxguma chi tama wena namaxēgu i duūxūgü i yuexū, ¿rü tūxcüü ngēma yuexūchicüü ínabaiū? ³⁰¿Rü tūxcüü i toma rü guxūguma āücūmaxūwa tangēxmagü? ³¹Pemaā nüxū chixu, Pa Chaueneēgūx, rü guxū i ngunexūgu rü āücūmaxūwa changēxma, rü tama nüxū chacuax i tacü rü ngunexūgu Tupanaärü oregagu tá na chayuxū. Rü ngēma rü aixcūmaxūchi nixī, ngēxgumarüü na aixcūma yīxū na choxū nangēxmaxū i wüxi i taēē i taxū i ñuxma na tórü Cori ya Ngechuchu ya Cristuaxū peyaxōgūxū. ³²Choma rü nuā Epéchiuwa rü Tupanaärü orechigagu chorü uwanūmaā poraācü togü tachoxūgagü. Rü ñoma naēxū i idüraexūmaā togü tađaixūrüü tixīgü. ¿Natürü tacüwa choxū namexū ga yema ega chorü maxū i ñoma i naānewa choxū

ngēxmaxūcaxicatama yixīgu? Rü ngēxguma chi aixcūma yixīgu na tama wena namaxēxū i yuexū, rü marü name i ñatarügügu:

“iNgīxā tachibüe rü taxaxegü, erü paxa tá tayue!” ñatarügügu. ³³iNatürü tāūtáma nawe perüxī i ngēma duūxūgü i ngēmaācü chixri idexagüxū! Erü aixcūma nixī i ngēma ore i ñaxū:

“Rü texé ya chixexū i duūxūmaā āmüciuxe, rü tūxū inayanaxoxēē i tūmacūmagü i mexū”, ñaxū. ³⁴Rü name nixī i meā pegüāēgu perüxīnūē rü nüxū perüxoe i ngēma perü chixexūgü. Rü wüxi i perü āne nixī na pemaā nüxū chixuxū rü ñuxre i pema rü tama aixcūma Cristuarü duūxūgü pixīgūxū rü tama aixcūma Tupanaxū pecuaxgūxū.

Ñuxācü wena namaxē i yuexūgü

³⁵Natürü bexmana wüxie tá pexna taca rü ñatarügü pexū:

“¿Ñuxācü tá wena namaxēxū i yuexū? ¿Rü nañuxraūxū i naxūnemaā tá ínadagūxū?” ñatarügü pexū. ³⁶Rü pemaā nüxū chixu rü wüxi i ngēāēxū nixī na ngēmaācü pexna taçaxū. Erü ngēxguma wüxi ya nanetüchane itoxgu, rü yima nanetüchane rü nayu na naxūxūcax i ngēma nanetü. ³⁷Rü ngēma waixūmūgu itoxū, rü wüxi ya triguchane rü exna tacü rü to i nanetüchane nixī. Rü tama nane i rüxūxū nixī i itoxū. ³⁸Rü ngēxguma marü ipenatoxguwena, rü Tupana nanaxūxēē ya yima nachane na nūma nanaxwaxexūācüma yīxūcax i ngēma nanetü. ³⁹Rü tama guxū i naxūnegü rü nawixigu. Rü duūxēxūne rü nanatoraxū, rü naēxūgūxūne rü to nixī, rü werīgūxūne rü to nixī, rü choxnigūxūne rü to nixī. ⁴⁰Rü

ngëxgumarüü ta nangëxma i naxünegü i daxügxüü i naānecüāx, rü nangëxma i naxünegü i ñoma i naānecüāx. Rü ngëma daxügxüü i naānecüāx i naxünegü rü nüxü nangëxma i noxrütama mexü, rü ngëma ñoma i naānecüāx i naxünegü rü ta nüxü nangëxma i noxrütama mexü. Natürü tama nawüxigu i ngëma norü mewa. ⁴¹Rü üaxcüarü yauracüü rü to nixĩ, rü tauemaciariü yauracüü rü to nixĩ. Rü woramacurigiariü yauracüü rü to nixĩ. Rü nügütanüwatama ya woramacurigü, rü tama nawüxigu i norü yauracüü. ⁴²Rü ngëxgumarüü tá ta naxüpetü namaā i naxünegü i ngëma duüxügü i yuexü. Erü ngëma naxüne i noxri nüxü ngëxmaxü rü iyarüxoxwaxexü nixĩ. Natürü ngëma naxüne i tá nüxü ngëxmaxü i ngëxguma wena namaxëgu, rü ngëma rü tagutáma inayarüxo. ⁴³Rü ngëma naxüne i yuxü rü taxuwama name i ngëxguma inataxgux. Natürü ngëxguma wena namaüxgu rü tá namexëchi. Rü ngëma naxüne i ñuxma turaxü rü ngëxguma wena namaüxgu rü tá napora. ⁴⁴Rü itanatax i ngëma naxüne i ñoma i naānecüāx ixixü. Natürü ngëxguma ínadxgu, rü daxücüāx i naxüne tá nixĩ. Rü ñuxma na nangëxmaxü i naxüne i ñoma i naānecüāx rü ngëmawa nüxü tacuax na nangëxmaxü ta i naxüne i daxücüāx. ⁴⁵Tupanaärü ore i ümatixüwa rü ñanagürü:

“Guma nüxüraücü ga yatü ga Adáü rü nüxü nayexma ga ñoma ga naānecüāx ga naxüne ga paxaāchi maxüxü”,

ñanagürü. Natürü ya Cristu rü daxücüāx nixĩ. Rü nüma nixĩ i tüxna naxāāxü i maxü i taguma gúxü. ⁴⁶Noxri rü tüxü nangëxma i ñoma i naānecüāx i taxüne.

Natürü yixcama rü Tupana tá tüxna nanaxā i to i taxüne i daxücüāx ixixü.

⁴⁷Guma nüxüraücü ga yatü ga waixümwüwa ücü, rü ñoma ga naānecüāx nixĩ. Natürü törü Cori ya Cristu rü daxügxüü i naānecüāx nixĩ. ⁴⁸Rü ngëma taxünegü i ñoma i naānewa tüxü ngëxmaxü, rü guma Adáüxüne ga waixümwüwa ücüü rü nixügü. Natürü ngëma naxünegü i daxüwa nüxü ngëxmaxü i duüxügü, rü Cristuxünertüü nixügü. ⁴⁹Rü ñgëxgumarüü na Adáü ga waixümwüwa ücüü rü na yixü i taxüne, rü ngëxgumarüü tá ta Cristu ya daxüwa ngëxmacürü nixĩ i taxüne i yixcüra.

⁵⁰Rü dücax, Pa Chaueneëgüx, pemaā nüxü chixu rü ñaā taxüne i namachinaxcax rü naxchinaxānaxcax, rü taxucürüwa Tupana äëxgacü íyixüwa nangu. Erü ngëma iyarüxoxü, rü taxucürüwama Tupanaxütawa i ngextá taxuüma íyarüxoxüwa nixücu.

⁵¹Natürü chanaxwaxe na nüxü pecuáxü i wüxi i ore i ëxügüxü ga noxri Tupanaxicatama nüxü cuáxü. Rü dücax, táütáma guxā tayue, natürü guxāxüne rü tá naxüchicüü. ⁵²Rü ngürüächimare wüxi i peāxëtüga tá nixĩ i ngëma na naxüchicüüxü i taxüne i ngëxguma naāneärü guxgux naxāgagu ya corneta. Rü tá naxāga ya yima corneta, rü ngëxguma i ngëma duüxügü i yuexü rü tá ínärüdagü na tagutáma wena nayuexücax. Rü yixema na imaxëxü rü tá naxüchicüü i taxüne. ⁵³Erü ngëma taxüne i yuxwaxexü rü woetama tama taixü rü tá naxüchicüü. Rü wüxi i ngëxwacaxüxü i naxüne i aixcüma taixü rü tagutáma yuxü tá nixĩ. ⁵⁴Rü ngëxguma ngëmaäcü naxüchicüüga i

taxüne i yuxwaxexũ, rü tüxũ
nangẽxmagu i taxüne i ngexwacaxũxũ i
taguma yuxũ, rü ngẽxguma tá nixĩ i
yanguxũ i Tupanaãrũ ore i ñmatũxũ i
ñaxũ:

“Marũ inayariũxo na nayuxũ i duũxũgũ.

Rü Tupana rü marũ yuxũ
nariyexera. ⁵⁵Rü dücax, Pa Yux,
¿ngẽxũ i curũ pora i namaã toxũ
curiyexeraxũ? ¿Rü ngẽxũ i ngẽma
cuxne i namaã toxũ cuðaixũ?”

ñanagĩrũ i ngẽma Tupanaãrũ ore. ⁵⁶Rü
ngẽma naxne i yu, rü pecadu nixĩ. Erũ
ngẽma pecadu nixĩ i naporaxẽxũ i ngẽma
yu na tüxũ naðaixũcax. Rü ngẽma mugũ
ga Moiché ñmatũxũ nixĩ i naporaxẽxũ i
pecadu, erũ woo namexgu i ngẽma mugũ,
natĩrũ taxucĩrũwama texé aixcuma
tayanguxẽẽ. ⁵⁷Natĩrũ name nixĩ i
Tupanana moxẽ taxã yerũ núma nanamu
ga tórũ Cori ya Ngechuchu ya Cristu na
ngẽma yuxũ tüxũ naporamaẽxẽxũcax.
⁵⁸Rü ngẽmacax, Pa Chaueneẽgũ ya Pexũ
Changechaũgũxex, rü name nixĩ i meã
peyaxõgũama rü taguma ípenatax i
Tupanaãrũ ore. Rü name nixĩ i guxũguma
meã penaxũ i tórũ Coriarũ puracũ, erũ
pema nüxũ pecuax rü ngẽma puracũ i
nüxũ pexũxũ, rü tama natũcaxma nixĩ.

**Dĩeru ga nutaquexecũ naxcax ga yema
togũ ga yaxõgũxũ**

16 ¹Rü ñuxma tá pemaã nüxũ chixu
i nachiga i ngẽma dĩeru i
penutaquexexũ na namaã nüxũ
perũngũxẽẽgũxũcax i taeneẽgũ i yaxõgũxũ
i Yudéaanewa ngẽxmagũxũ. Rü ngẽma
yaxõgũxũ i Gárateanewa ngẽxmagũxũ rü
marũ namaã nüxũ chixu na ñuxacũ tá
ngĩxũ nanutaquexegũxũ i ngẽma dĩeru. Rü

chanaxwaxe i ngẽxgumarĩũ ta penaxũ i
pemax. ²Rü guxcũ i yũxũarũ ngunexũgu
rü name nixĩ i wũxichigũ i pema rü ngĩxũ
ípexũxũchi i ngẽma dĩeru i Tupanana
ngĩxũ pexacũ. Rü ngẽxgumarũ na ñuxre i
dĩeru ngĩxũ peyaxuxũ i perũ puracũwa, rü
name nixĩ i wũxichigũ ngĩxũ ípexũxũchi i
ngẽma Tupanaãrũ ixĩcũ. Rü ngĩmaã tá
penguxũ na tama ngẽxguma ngẽma
changuxguama ngĩxũ na pedexũcax. ³Rü
ngẽxguma petanũwa changuxgu, rü tá
chanaxũmatũ i ñuxre i poperagũ naxcax i
taeneẽgũ i Yerucharẽũwa ngẽxmagũxũ. Rü
ñuxũchi ngẽma poperamaã tá
Yerucharẽũwa chanamugũ i ngẽma
duũxũgũ i pema nüxũ pexunetaxũ na
ngẽma ngĩxũ nangegũxũcax i ngẽma dĩeru
i taeneẽgũcax ngĩxũ penutaquexegũcũ.
⁴Rü ngẽxguma chi choxũ natauxchagu na
ngẽma Yerucharẽũwa chaxũxũ, rü choma
rü tá ta ngẽma chaxũ, rü nümagũ rü tá
wũxigu chomaã ngẽma naxĩ.

**Pauru nagu narũxĩnũ na
Corĩtiuwa naxũxũ**

⁵Choma rü Machedónĩãanewa tá
chaxũpetũ na íchayadauxũcax i taeneẽgũ i
ngẽma ngẽxmagũxũ. Rü ngẽmawena rü tá
petanũwa changu na pexũ
íchayadauxũcax. ⁶Rü ngĩrũĩachi tá ñuxre i
ngunexũgũ ngẽxma petanũgu charũxãũx,
rü bexmana ngĩrũĩachi ngẽma petanũwa tá
chanangupetũxẽẽ ya mucũ. Rü ngẽxguma
rü tá pexũ natauxcha na choxũ
perũngũxẽẽgũxũ na ngẽma
íchaxũxchaũxũwa chaxũxũcax. ⁷Erũ tama
chanaxwaxe i paxaãchimare pexũ chadau.
Natĩrũ chanaxwaxe i poraãcũxũra
petanũgu charũxãũx ega nanaxwaxegu ya
tórũ Cori. ⁸Natĩrũ nuã Epẽchiuarũ iãanewa

tá changẽxma ñuxmatáta Pêtecósteari
ngunexũwa nangu. ⁹Erĩ nuã rĩ tórũ Cori
poraãcũ choxũ nanatauxchaxẽẽ na nũxũ
chapuracũxũcax rĩ nũxũ yaxõgũãxũcax i
muxũma i duũxũgũ woo namu i ngẽma
tama naxwaxegũxũ na nuã chapuracũxũ.
¹⁰Rũ ngẽxguma chi Timutéu petanũwa
nguxgu, rĩ chanaxwaxe i meãma
penayaxu na petanũwa nataãẽxũcax. Erĩ
nũma rĩ ta chauxrũ tórũ Coriari
puracũwa napuracũ. ¹¹Rũ ngẽmacax tama
chanaxwaxe i texé petanũwa nũxũ taxoe.
Natĩrũ chanaxwaxe i nũxũ perũgũxẽẽ na
taãẽacũma nuã naxũxũ na choxũ
fyadauxũcax. Erĩ poraãcũ íchananguxẽẽ
na nuã nanguxũcax namaã i ngẽma togũ i
taeneegũ. ¹²Rũ ngẽma taeneẽ i Aporu rĩ
poraãcũ nũxũ chacaaxũ na petanũwa
fyadauxũcax namaã i ngẽma togũ i
taeneegũ. Natĩrũ tama ngẽma naxũxchaũ i
ñuxmax. Natĩrũ ngẽxguma naxãchicagu
rĩ tá ngẽma naxũ.

Pauru nũxũ narũmoxẽ ga yema yaxõgũxũ

¹³iRũ pexuãegũ na taxuũma i
chixexũgu peyixũcax! iRũ meãma
peyaxõgũama woo tacũ pexũ upetĩgu!
Rũ name nixĩ i peporaeama rĩ
taxucaxma pemuũẽ. ¹⁴Rũ guxũma i
ngẽma pexũxũ, rĩ name nixĩ i pegũ
pengechaũgũãcũma penaxũ. ¹⁵Rũ
ñuxmax, Pa Chaueneegũx, pema nũxũ
pecuax na Estéfanatanũxũgũ yĩxũ ga
nũxĩra yaxõgũxũ ga Acayaanewa. Rĩ
meãma nũxũ pecuaxgũ na ñuxãcũ
poraãcũ taeneegũ i yaxõgũxũxũ na
nangũxẽegũxũ. ¹⁶Rũ chanaxwaxe i naga
pexĩnũẽ i ngẽma duũxũgũ i
Estéfanatanũxũgũrũĩ ixĩgũxũ. Rĩ

ngẽxgumariũĩ ta chanaxwaxe i naga
pexĩnũẽ i guxũma i ngẽma duũxũgũ i
ñaã Tanatũari puracũwa puracũexũ rĩ
ngũxẽẽtaegũxũ. ¹⁷⁻¹⁸Rũ ñuxma na
taxucũrũwama chauxũtawa
pengẽmagũxũ, rĩ wũxi ga chorũ taãẽ
nixĩ na núma naxĩxũ ga taeneegũ ga
Estéfana rĩ Fortunátu rĩ Acáicu. Rĩ
yema taeneegũ ga núma íxũ rĩ pexũ
nixuchigagũ rĩ yemaãcũ choxũ
nataãẽxẽegũ ga yema pexũ na
nataãẽxẽegũxũrũĩ. Rĩ tanaxwaxe i naga
pexĩnũẽ rĩ nũxũ pengechaũ i ngẽma
duũxũgũ i ngẽmagũrũĩ ixĩgũxũ. ¹⁹Rũ
guxũma i taeneegũ i yaxõgũxũ i
Áchiaaneãrũ iãnegũwa ngẽmagũxũ, rĩ
moxẽ pexcax ngẽma namugũ. Rĩ Aquiru
rĩ Prisila rĩ guxũma i ngẽma yaxõgũxũ
i Aquirupatawa ngutaquexegũxũ, rĩ
moxẽ pexcax ngẽma namugũ naégagu
ya tórũ Cori. ²⁰Rũ guxũma i taeneegũ i
núma ngẽmagũxũ rĩ moxẽ pexcax
ngẽma namugũ. Rĩ chanaxwaxe i
wũxichigũ i pema rĩ pegũ
pengechaũgũãcũma pegũ perũmoxegũ.
²¹Choma i Pauru rĩ choxmexmaãtama
pexcax chanaxũmatũ i ñãã chorũ moxẽ.
²²Rũ ngẽxguma chi texé tama tórũ Cori
ya Ngechuchu ya Cristuxũ ngechaũgu,
rĩ Tupana tá tũxũ napoxcu. Rĩ paxa tá
ínangu ya tórũ Cori. ²³Rũ chanaxwaxe i
tórũ Cori ya Ngechuchu ya Cristu
poraãcũ pexũ narũngũxẽẽ rĩ pemaã
inarũxãũx. ²⁴Rũ guxãma i pema, rĩ
poraãcũ pexũ changechaũãcũma pexũ
charũmoxẽ naégagu ya tórũ Cori ya
Ngechuchu ya Cristu.

*Rũ nuãma pexna,
Pauru*